

# मन्तारि नाद



**MANGLA DEVI**

Gund Gushi Kupwara, Kashmir



स्वामी भाद





# मनुतारि नाद

जवाहर लाल भट्ट 'जवहर'

दुर्गानगर, तालाब तिल्लू, जौम।

# मनुतारि नाद

( व्यनच तु लीलायि )

जवाहरलाल भट्ट 'जवाहर'

पताह:- मकान न० - 127/इ.दुर्गा नगर

तालाब तिलो - जम्मू

0191-2554043

मो - 9469352921

---

## (येमि शार सोम्बरनि हुंघ् सॉरी हकूक छि रँछरिथ)

नाव	:-	“मनुतारि नाद”
शॉयिर	:-	जवाहर लाल ‘जवहर’
यथ मंज	:-	व्यनँच तु लीलायि
नज़रि सॉनी तु		
नागरी कॉशुर	:-	पृथ्वीनाथ कौल “सायिल”
कुल सफु	:-	.
तेदाद	:-	500 पांछ हथ
कमप्यूटर मॉहिर	:-	साधना कौल
		पृथ्वीन एण्ड सन्ज - जोम
म्वल	:-	100 खपयि
छापन वोल्	:-	ख्वद शॉयिर
छापखानु	:-	<b>Raina Art Printers</b>
		# 9419141499
		E-mail : rainaartprinters@yahoo.in

किताब मेलनुक पताह:-

1. J.L. Bhat “Jawahar”  
127/E Durga Nagar, Talab Tillo,  
Jammu. Tele. : 0191-255043  
(M) 9469352921
2. JK Book Shop  
Talab Tillo, Jammu



## अर्पण



स्व० राजरॉनी भट्ट ( दीवकी)

तस पनुनि हैचि मातायि हुंघन पादि कमलन येमि पनुन्य्  
वॉलिंजि वस दिथ बु पोलुस प्यतरुस  
तु बोड वातुनोवुस  
— जवहर —



## —व्यस्तार—

शुमार	रचना	सफु
1.	ग्वडु कथ ( पी.एन.कौल 'सायिल')	
2.	म्यॉन्यु कथ (जवाहर लाल भट्ट 'जवहर')	
3.	आदि दीव महा गणपत	
4.	सथ ग्वर	
5.	शामु स्वंदर	
6.	दया सागर	
7.	बजि दयाये	
8.	नन्दुबब मस्तानय	
9.	जगत माता	
10.	सम्सार भ्रम	
11.	नव दुर्गा	
12.	अथ।छोन	
13.	म्योन दिलबर	
14.	हरुहरु	

15. वैष्णव माता
  16. गंगा माता
  17. जगतुच राजिरेन्यु
  18. मनि कामन
  19. मारु मोत
  20. थनि चूर
  21. भगवान गुपु बब
  22. दीवीदारन जंय जयकार
  23. यियिना पाद छलुहस
  24. बालु गूपाल
  25. स्वरतु जीवु रामु नामय
  26. ग्वरु दीव
  27. यन। असि गरि द्रायि
  28. थावतम गोश
  29. चाने नादय
  30. सायस तल
  31. सालु कृष्णो
-

32. नौन दर्शुन
  33. बोज़तम ऑचर
  34. रॉगिन्या भवॉणी
  35. हरे रामो
  36. जय लक्ष्मी माता
  37. अस्तोती
  38. गवरी शंकर
  39. संत्वष्ट रोज़तम
  40. करतय व्वपुकार मॉजॉय
  41. मनु मंदर
  42. दीवस छुस दिवान नाद
  43. चाने कृपाये प्रारान
  44. प्रणाम बॉव्यनय
  45. रोटमय दामानय
  46. दया वन्य् कर
  47. गुपु बबु भगवानु यॉरी कर
  48. ज़गि हुंदि रक्षपालु
-



49. चारान ही तु मसवल
50. करुम अथु रोट
51. यिहुमना यूर्य कलवालो
52. नादान पानो चैन
53. रेशि पीर साँबस व्यनथ
54. वति मो राव
55. रेशि पीर साँबो यॉरी कर
56. यियनय आर माजॉय
57. शरणागत छु आमुत
58. प्रारान डेडि तल
59. नन्द बब मस्तानु
60. युस परि हरु हरु
61. बालु यार
62. मंगला दीवी
63. साई बाबा
64. परम दीव
65. माजि मंगलाये जय जयकार



(ग्वडुत)

## कथ छेनु यिथु कैह

अज्रतान्य् वुछि मे वारयाह शारु सोम्बरनु । यिमन मे गाहे खत ( लिपी ) शेरुन प्यव । अदुया अकि रस्मि खतु प्यठु दौयमिस रस्मि खतस मंज्र फिरनुच कॉम करुन्य् पैयि । अकसर यिछन किताबन पैयि मे ग्वडुत्य् या 'ज्ञान' लेखनि । मे वुछ प्रथ लिखॉरिस छु पनुन पनुन प्रेरक । ति क्याजि यिम लॅतीफ फन छि कुनि ति वुजिनि हुंघ् पॉठ्य आगुर थावान । अङ्घन छि मातामाल, अंदु यि ज्वय वातान तु अङ्घन गरु अंदु । बाजे कॉन्सि रुतिस ग्वणुमात सुंजि संगती मंज्र ति रटन बानु आसन वॉलिस ताम यिथ्यन फनॅन हुंद असर वातान । कुनि न तु कुनि अंदु छु यि फन सॅज्य् सॅज्य् कलु कडान तु प्रॅखटान । दपान छिना जि कुन्युक ब्योल छुनु तर नेरनु वरॉय रोजान । कथ छेनु यिथु कैह ।

तुहुन्घन अथन मंज्र य्वस यि व्यनॅच मालि हन "मनुतारि नाद" नावुच छे । यि ति छे अकिस संतु सुन्दिस खानदानस सुत्य् वाबस्तु रेश खसलॅच हुंदिस संस्कॉरी शाख्सु सुंज जेहनी तखलीफ । अॅमिस छु नाव जवाहर लाल भट्ट तु कलमी नाव छु 'जवहर' लेखान । पौरमुत ल्यूखमुत अख रिटार्याड व्वस्ताद छु क्वपुवार्य जिलुकिस 'गोंड गुशी' गामस मंज्र अॅकिस डॅखिजल जॅमीनदार स्व० जियालाल भट्ट सुन्दि गरि १९४० ई० जन्मस आमुत । 'जवहर' छु स्यठहुय द्वखजद गरुक अवलाद । वुनि ओस ऑठवुहरुय तु सपुद १९४८ ई० युक कबॉल्य् हमलु । अदु यिहुंद गाम ति आव अथ जदस मंज्र । कबॉल्य् लूटर्यव कॅर्य अकिय सातु यिहुंघ

ऑठ- नव नफर शहीद। यिमन मंज अँम्यसुंद मोल ति ३७ वुहरुय कतुल आव करनु। आठ ज़नानु गँयि विदवाह यिमन मंज 'जवहर सॉबुन्यू' मॉज ३१ वॅरिशी ति शॉमिल ऑस। यि कतलु गारत सपुद 'जवहर' सॉबन्यू अँछन ब्रोंठुकनि तु अँहन्दिसुय आंगनस मंज। अदु अमि जुल्मुक यि खतरनाक मंजर कति हैकि अँमिस ज़ांह मॅशिथ।

पांचन शुर्यन हुंज़ि अँहुन्ज़ि माजि गोंड होल तु ह्यमथा कॅरिथ पॉलिन तु प्यतरॉविन, फॉन्फ्लॉविन यिम मॉल्यू यतीम बचि। मीलि कलमु कॅडिथ, कॅडिन छटि बटि। अथ मंज कोर अँमिस पनुन्यू बॉय युस अख सरकॉर्य व्वस्ताद ओस, प्रथ रंगु मदद। शुर्य बडेयि तु जवहर सॉबन पोर ल्यूख मैट्रिक पास कॅरिथ लोग व्वस्ताद। पतु कोरुन बी-ए-बी-एड तु रूद द्वहँ पथ द्वहँ तरकी करान तु गरु बार संबालान। ईमानदॉरी सान कोरुन पनुन गर गृहस्तुक कारुबार। वुन्यूक्वन छि यिम रिटायर मुलॉज़िम।

'जवहर'सुन्दिस स्व० पिता जियस गँयायि 'स्वामी आफताब जी कारिहॉमी' पनुन्यू असुल मामाजी। स्वामी जी छि नामावार संत तु भक्ति कवि माननु यिवान। यिमव छे पनुनि बॅखती रच़नायि "भास्कर प्रकाश" नावु भजन सोम्बरनिहन छाप करनॉवमुच़। यि लीलायि सोम्बरन छे भक्तिभावुच अक थ्यकुन्यू लायक किताब।

बकोलि 'जवहर' बु रूदुस स्वामी जियस निश बार बार गछान तु तिहुन्द ऑशर्वाद रटान। तिम ति ऑस्यू मे स्यठाह टाठिन्यार करान। दपान अति आसु आमतौर भजन मंडली लगान।



तु जवहर ति ऑस्य् तिमन मंज चावु सान शॉमिल सपदान । भास्कर  
 प्रकाश ति ऑस्य् बडु दिलचस्पी सान परान तु अमि मंजचि रचनायि  
 ऑस्य् पनुनि माता जियि ति बोजुनावान । यिय करान करान आयि  
 यिमन म्वखस सरस्वती तु यिमव ति हैच गुंगुराय करुन्य् । वारयाह  
 कैह वौनुख । गज़ल, नज़्म, वाख तु व्यनैच बेतरि रूद्य वनान । पनुन्य्  
 अख व्यनैच सोम्बरन छख 'नमन माला' नावु बाज़र ति कैडमुच ।  
 यिहुंद कलाम रूद वारयाहन रिसालन मंज ति छपान । कैह रचनायि  
 गॅयि मकबूल ति । नमन मालायि म्यूल स्यठाह दाद । अदु अँम्य्  
 बडोव यिहुंद होसलु बेयिहन । कवि गोष्टियन मंज ति रूद्य शरकत  
 करान ।

जवहर छु शोद श्रूच तु ओर भगवान बैखुत्य् । पनुन्य् न  
 ज़िठ्यन खास कैरिथ पनुनि माता श्री हुंद पोज़ सीवक तु तिहुन्दव  
 दित्य्मुत्य् संस्कारव बोरुत यि शॉयिर छु क्वठ्यव पकान । अमि  
 येमि वरॉय छु पनुन्य् भाव शारन मंज बावान । बराबर अभ्यास  
 करान रोज़नु किन्य् छु बासान ज़ि यि प्रावि जान मकाम तु नाव ति  
 कमावि । अँमिस छे पनुनि माजि हुंज ऑही तु ज़िठ्यन हुंद ऑर्शिवाद  
 डखि । अँजिच यि व्यनैच माल छे पँज्य् पॉठ्य परुन्य् लायक । यि  
 छु भक्ति मार्गस कुन पौद पौद दिवान । दय दियनस प्रथ कदमस  
 प्यठ कामयाँबी । मे छे व्वमेद ज़ि जल जलुय कडि यि येमि पतु  
 'जलुवन्य् शार' नावुच शारु सोम्बरन ति बाज़र । बु यछ यिय ज़ि  
 "जवहर" गोछ पनुन्य् म्वलुन्य् जवहर हावुन तु पनुन कलचर  
 प्रज़लावुन । अँमिस छु दयन त्युथ बितुर त्युथ गाटुजार तु ब्वद  
 बखुशमुच । यिहुंद्य् कैह शार करु बु नमून खॉतरु येत्यथ दर्ज :-

ग्वडन्यथुय छु कवि सोद्धिदाता आदि दीवस व्यनथ करान वनान:-

बु आसय चानि अमारय  
करुम चारय चै यीनय आर,  
चु गज़ म्वख सेद्धि दातारय ॥  
करुम चारय चै यीनय आर ॥० ॥



ग्वरु दीवस छि यिथु यिथु कॅन्य् आराधना करान :-

सथ ग्वरु वथ मै हावतम,      काँदु मंजु म्वकुलावतम ।  
सतुची वथ मै हावतम ॥      काँदु मंजु म्वकलावतम ॥० ॥



या

ग्वरु दीवु लगयो च़ेय पार्य पॉरी,  
असि कर यॉरी ज़ॉरी बोज़ ।  
शरणुय आमृत्य् लूक्क्य् बॅङ्क्य् सॉरी ॥  
असि कर यॉरी ज़ॉरी बोज़ ॥० ॥

या

हमु दमु छम मेय चॉनी कल,  
गुप बबु वरतम पादन तल ।  
भावणायि छलुहय च़रणु कमल ॥  
गुप बबु वरतम पादन तल ॥० ॥



‘जवहर’ छु दीवीदारन पनुन मायि बोरुत प्रणाम सोज़ान तु वनान:-

अँस्य् आयि लारन वति वति छारन

दीवीदारन जय जयकार ।

व्यनु तय ग्वलाब छिय हलमव सारन ॥

दिवीदारन जय जयकार ॥० ॥



बालु गूपालस छु यिथु पॉठ्य व्यन्ती करान:-

लालु म्यानि करुयो पोशि वरुनये

‘जवहरस’ हाव शवब दर्शुनये ।

बॅर्य बॅर्य थावुयो द्वदु हरु प्यालो ॥

बालु गूपालो छुय सोन साल ॥० ॥



पनुनि गरि कॅशीरि प्यठु चॅलिथ यिथ कुस हाल गव असि, तथ कुन  
इशारु दिवान छु ‘जवहर’ वनान तु व्यदाख दिवान —

यनु अँस्य् गरि चॅल्य् तनु छिनु वारय,

मॉज दुर्गा कर चारय सोन ।

अँड्य खेयि तापु हायि, अँड्य बेमारय ॥

मॉज दुर्गा कर चारय सोन ॥० ॥





शॉयिर छु माजि भगवँती यिथु कँन्यु नाद लायान—

आयि सॉरी मायि लारान, छिय करान अँस्यु असतोती  
मायि चाने पोश चारान ॥ पूजि लागोय भगवँती ॥

(या)

दासस बोजि ज़ारुपार, करतय व्वपुकार मॉजॉय  
चुय शर्यन छख तर्फदार ॥ करतय व्वपुकार मॉजॉय ॥० ॥



‘नादान पानो चेन’ नावचि रच़नायि मंज़ छु शॉयिर पानस तानु  
दिवान दिवान सारिनुय कुन वनान —

सूच सूच तुल कदम वारु थव ध्यानो  
नादान पानो चेन ।

डींश डींश सम्सार गछ़मु हॉरानो ॥  
नादान पानो चेन ॥० ॥



कलय्वगुकिस मनुशस छि यिथु पॉठ्य चेनुवन दिवान —

हरु हरु करतो गरु मो त्राव, मनशि मोर प्रॉविथ वति मो राव ।  
ज़ीवन मंज़ चुय नाव थोद थाव  
मनशि मोर प्रॉविथ वति मो राव ॥० ॥



शॉयरन छे दीवियन दीवताह सुत्य् सुत्य् “रेशपीर सॉबस”  
 भगवान गोपीनाथ जियस, साई बाबाहस, गंगा मातायि, वैष्णव मातायि,  
 रॉगिन्यायि, शारिकायि, थनि चूरस तु शिव शंकरस कुन व्यनॅच  
 करिमचु तु यिम सॉरेय छे परनि लायक ।

दय थॅव्यनस यॅहय नियत तु यॅहय बॅखती कॉयिम ।

भीष्म ऑठुम / भोमवार

31 - जनवरी 2012 ई०

रुत कांछन वोल

पृथ्वीनाथ कौल 'सायिल'

138/4/4, शारिका विहार

रूप नगर जोम - 180013

## म्याँन्य् कथ

बु छुस १९४० ईस्वी सनु किस मार्चस मंज शहीद जियालाल भट्टनि गरि ज़ामुत। युस १९४८ ई० मंज कबॉलियव बेयन ऑठन बटन सुत्य् शहीद कस्याव। तँम्य् सुंज वॉन्स ऑस तमि विज़ि सिर्फ ३७ वॅरी। येलि ज़न म्याँन्य् मॉज यस मालिन्युक नाव दीवकी तु वॉर्यव्युक नाव राजिरेन्य् ( राजरॉनी) ओस, ऑस ३१ वॅरिशी। सानि खांदानुक्य् सॉरी कमायि कुल्य् आयि बडु बेददी सान म्याँन्यन् अँछन ब्रॉह कनि सॉनिसुय आंगनस मंज गोल्य्व सुत्य् मारनु, सानि महलुक्य् सॉरी बटु गरु आयि लूटनु तु वुछान वुछान गॅय अँस्य् बेबस तु बे सहारु। यिम मारुन आय तिमन मंज ओस अख १६ वुहुर लॅडकु ति तु बाकुय ऑस्य् सॉरी बाल्यग तु अयालु वॉल्य्। ऑठ ज़नि गयि अकिय सातु विदवाह। यि कतलु गारत छु मे येलि बु तैलि याद प्यवान। कबॉयलन हुंघ् जुलमन तु जबरन कॅर्य् अँस्य् जुव लर्ज़ु गरु त्रॉविथ गुशी प्यठु सोपोर चलनस प्यठ मजबूर। पांचन शुर्यन हुंज मॉज म्याँन्य् ऑस धर्मिष्ट, ह्यमॅच वाजेन्य्, गाटुज तु स्यठा ग्वनुवॅती। अमिय हेचि माजि द्युत असि सायस तल रॅछिथ, पॉलिथ प्यतरिथ होसलु। सोन मामाजी युस पेशि किन्य् व्वस्ताद ओस रूद पनुनि बेनि दीवकी मदतस। चलनु पतु द्वयि वुहुर्य येलि हमलु व्वलुहॅरिश हना बीठ, गॅयि अँस्य् सोपोर प्यठु पनुन गाम गोंड गुशी वापस। युस क्वपवॉर्य् कस्बु प्यठु त्रै किलोमीटर नालु कहिमिल हुन्दिस बॅठिस प्यठ जंगलकिस दामनस तल वाका छु। अति छि मंगला दीवी तु शारदा मातायि हुंघ् ज़ मशहूर अस्थापन।



म्याँन्य् इब्तिदौयी तौलीम गॅयि प्राइमरी स्कूल गुशी प्यठु शोरू। १९५५ई० यस मंज़ कोर मे त्रुहु गाम हाई स्कूल तर्फु मैट्रिक पास। १९६०ई० यस मंज़ लोगुस बु उस्ताद तु पतु कोर मे बी.ए.बीएड। वुन्य्क्यनस छुस बु मुलॉज्यमतु निशी रिटायर सपुदमुत।

स्वामी आफताब जी महाराज कारिहामी ऑस्य् म्याँनिस पिता जी सुन्धू मामाजी, यिम ऑस्य् स्यठाह जान महात्मा तु भक्ति कवि ति। तिमव ऑस पनुन्य् लीलायि सोम्बरन “भास्कर प्रकाश” नॉव्य् छाप कॅरमुच। अथ मंज़ ऑस्य् भजन तु बॅखती रचनायि शॉमिल।

बु ओसुस मंज़ु मंज़ु यिमन प्रणाम करनि तु यिहुंद ऑशीर्वाद हॉसिल करनि यिमन निश कारिहोम गछान। भास्कर-प्रकाश ओसुस बु चावु तु लोलु सान परान। पतु ओससन पनुन्य् मॉज बोज़नावान। बबु महाराज सुन्ज़ि दयायि तु माजि हुन्दि ऑशीर्वाद सुत्य् ह्योत मे ति वारु वारु अदबुकिस मॉदानस मंज़ कदम त्रावुन। मे ति हेछ हर्फ़ जुरनावुन्य् तु तुकबॅन्दी हुंद दस तुलुन। सोन अलाकु ओस अदबी मॉदानस मंज़ स्यठा पथ। लिहाज़ा बन्याव नु कांह वतु हावुख अमा बु रूदुस लीलायि, गज़ल, नज़्म तु वचन बेतरि लेखान। १९९०ई० यस मंज़ प्यव असि कॉशर्यन गरु बार त्रॉविथ चलुन। वारयाह बे तरतीब अदबी सरमायि गव व्वलहॅर्यशि बुज्य्। तिव्याज़ि सॉन्य् मकानु ति ऑस्य् सानि चलनु पतय ज़ालनु आमत्य्। मे लोग वुतुश ह्युव तु यि केंछा म्योन बचामुत मुवाद ओस। मे ह्योत यि शेरुन संबालुन तु सोम्बरवुन। रिटायर गछिथुय गोस बु सोम नाथ भट्ट ‘वीर सॉबस’ निश तु तिमव दिच म्याँनिस अथ

मवादस नज़र तु हॉवुख मे वथ । पतु गोस बु अकि द्वहें पुरखो तति  
गव श्री मक्खन लाल कंवल सॉबस सुत्य् मुलाकात । तिमव ति  
कोर मे मदद । बु छुस 'वीर सॉबुन तु कंवल सॉबुन' स्यठा शुहगुज़ार ।  
२००६ ई० कॅर स्व० काशी नाथ 'बागवान सॉबन' यि किताब  
इजराह अथ ओस नाव 'नमन माला' । मे थॅव आजमॉइश जॉरी  
कूशिश छुस करान ।

यि कथ वनून्य् ति छुम फर्ज बासान ज़ि बु रूदुस नॉगिराय  
लिटरेरी फोरमुचन अदबी मॅहफिलन मंज़ अँकिस म्यम्बरु सुन्दि  
हॅस्य्यत शिरकत करान ।

अज़ छे मे बेयि अख, ज़ु किताबिहनु तयार करिमुच ।  
अख छे व्यनचन, तु लीलायन हुंज़ । अथ छु नाव "मनु तारि नाद"  
तु दोयिम "जलुवन्य् शार" यथ मंज़ गज़ल, नज़्म, वचन तु बाख  
बेतरि छि । यिमन द्वन किताबन तयार करनस मंज़ रूद्य् मे पंडित  
पृथ्वीनाथ कौल 'सायिल' सॉब रॅहबरी करान तु मदद करान । बु  
छुस सायिल सॉबुन स्यठाह स्यठाह शुहगुज़ार ।

जलदुय वाति स्वति तुहन्धन अथन मंज़ । ज़ेरि नज़र किताब  
वुछिथ छुम बासान ज़ि परनवॉल्य् करन म्यॉन्य् अडुकॅल्य् तु अडुफॅल्य्  
व्यचार तु जज़बात पसंद । तु पनुन्य् म्वलुल्य् तोसुरात बडावन  
म्योन होसलु ।

जवाहर लाल भट्ट 'जवाहर'

## हरि ॐ तत्सत आदि दीव महागणपत

बु आसय चानि अमारय  
करुम चारय चै यीनय आर ।  
चु गज़ुम्वख सेदि दातारय ॥  
करुम चारय चै यीनय आर ॥० ॥

चु आदि दीव छुख महागणपत,  
करय प्रनाम सुबुह शाम न्यथ ।  
फ्वलय बो चानि दीदारय ॥  
करुम चारय चै यीनय आर ॥० ॥

वतु त्वण्डु छुख वैघनु हर्ता,  
व्वमा पौत्रुय मंगल कर्ता ।  
करान नारस चु गुलज़ारय ॥  
करुम चारय चै यीनय आर ॥० ॥

प्रथम पूज कर लम्भूदरसुय,  
रँटिथ चोन नाव मंज़ मनुसुय ।  
दयासागरु करतु व्वपकारय ॥  
करुम चारय चै यीनय आर ॥० ॥



रिद्धि सिद्धी चैय आँदीन छय,  
 करुम पापन तु शापन क्षय ।  
 दीवु गन हुंद चु म्वखतारय ॥  
 करुम चारय चै यीनय आर ॥० ॥

पूजि लागय बो प्रेयम पम्पोश,  
 स्यठा आमुत मै लोल बरजोश ।  
 पान आलुवय तय ध्यान दारय ॥  
 करुम चारय चै यीनय आर ॥० ॥

बालुचेंद्रु चै जरय 'जवहर' तु लाल,  
 नॉल्य् बो त्रावय पम्पोशि माल ।  
 बोज़तम आरुहोत ज़ारुपारय ॥  
 करुम चारय चै यीनय आर ॥० ॥



## सथ ग्वर

सथ ग्वर वथ मै हावतम,                      काँदु मंज़ म्वकुलावतम ।  
 सतुची सथ मै थावतम ।  
 काँदु मंज़ु म्वकुलावतम ॥० ॥

वोलमुत छुस सदुमन,                      लगुयो पॉर्य कदमन ।  
 ओन छुस गाश हावतम ॥  
 काँदु मंज़ु म्वकुलावतम ॥० ॥

नावु किन्य् छुस इन्सान, कर्मव किन्य् बु हयवान ।  
 मतु मंदुछावु नावतम ॥  
 काँदु मंजु म्वकुलावतम ॥० ॥

पापव बु आवुरोवमुत, शापव वति डोलमुत ।  
 रुचि वति पकुनावतम ॥  
 काँदु मंजु म्वकुलावतम ॥० ॥

मायि चानि आस लारान, डेडि तल छुस प्रारान ।  
 श्वब नज़राह मै त्रावतम ॥  
 काँदु मंजु म्वकुलावतम ॥० ॥

दर्दिल छुख म्योनय, वंदुयो कॅबीलु होनुय ।  
 रुत्य् कार करनावतम ॥  
 काँदु मंजु म्वकुलावतम ॥० ॥

बोलनस कामु हूधन, मदन, मोहन तु लूधन ।  
 ज्ञानु दुफ प्रजुलावतम ॥  
 काँदु मंजु म्वकुलावतम ॥० ॥

चुय छुख म्योन रँहबर, पूजि लागय लाल 'जवहर'  
 हरु हरु परुनावतम ॥  
 काँदु मंजु म्वकुलावतम ॥० ॥



## श्याम स्वंदर

म्योन म्वरली मनोहर,  
लागस बु पोशि ग्वंदर ॥

यियिना सु सोन सालय,  
चावन बु मस प्यालय ॥

छांडन बिन्द्राबनुसुय,  
गोमुत मे होल मनुसुय ॥

वैन्त्य दिवान मथुराये,  
नालान गूरुच बाये ॥

नॉल्य् छुनस खॉल्य् मालय,  
हावन स्वखु चालय ॥

अछु रछु वछु नचने,  
मचु गॅयि लजि यछुने ॥

टोठ छुय सु कामु दीनन,  
द्वद वुय ह्यथ छि प्रारन ॥

गूर्य बालुकन तु गूपियन,  
तिमनुय छे मनि कामन ॥

हियि पोश शेरि लागोस,  
शूबवुन छु बनसीधर ॥

यियिना सु श्याम स्वंदर ।

यियिना सु श्याम स्वंदर ॥० ॥

लागुहस पोशिमालय,  
यियिना सु श्याम स्वंदर ॥० ॥

आस्य्म सु कथ वनुसुय ।  
यियिना सु श्याम स्वंदर ॥० ॥

वति वति जायि जाये ।  
यियिना सु श्याम स्वंदर ॥० ॥

जरबाफ वलस दुशालय ।  
यियिना सु श्याम स्वंदर ॥० ॥

लोलु हचु लजि ब्रुछुने ।  
यियिना सु श्याम स्वंदर ॥० ॥

लोलु छस टांगु दिवन ।  
यियिना सु श्याम स्वंदर ॥० ॥

सुत्य् छुय सु रास खेलन ।  
यियिना सु श्याम स्वंदर ॥० ॥

‘जवहरव’ मुकटु सजावोस ।  
यियिना सु श्याम स्वंदर ॥० ॥



## दयासागर

दयालू छुख दया सागर,

दया वन्य् कर, दया वन्य् कर ।

वैष्णु, ब्रह्मा चुय महीशर ॥

दया वन्य् कर, दया वन्य् कर ॥०॥

करान व्यन्ती छुसय नैमिथय,

शरण आमुत गुल्य् गैन्डिथय ।

दितम शॉन्ती च्ल्य्म ज़रु ज़र ॥

दया वन्य् कर, दया वन्य् कर ॥०॥

द्वखव दाद्यव छि अँस्य् वँल्य्मत्य्,

गमव सुतिन अँन्दुर्य् गँल्य्मत्य् ।

शर्म रछ वन्य् क्षमा चुय कर ॥

दया वन्य् कर, दया वन्य् कर ॥०॥

ख्वद्यव कर्मव गँमुत्य् कमज़ोर,

छे सखती, नैय् छु पापुन बोर ।

करुम अथुरोट तु दिम आसर ॥

दया वन्य् कर, दया वन्य् कर ॥०॥

ह्यवान युस लोलु चोनुय नाव,

तसंज़ मा ज़ांह चु थावान ग्राव ।

गछ़ान चानि नज़रि अकि मुन्नवर ॥

दया वन्य् कर, दया वन्य् कर ॥०॥

छु द्वर्लभ म, नुशि मोर प्रावुन,

छो नो मॅशरुन यि रॅछुरावुन ।

छु खारवुन रथि अथ चोनय वर ॥

दया वन्य् कर, दया वन्य् कर ॥० ॥

यि दुस जगतस छु चोन एहसान,

बु कति अनु ज्यव करय शुहान ।

चु यस यावर सु बनि 'जवहर' ॥

दया वन्य् कर, दया वन्य् कर ॥० ॥



## बजि दयाये प्रारान छिय

अँस्य आयि लारान चाने माये,      बजि दयाये प्रारान छिय,  
सॉरिसुय जगतस छु चोनुय साये ॥ बजि दयाये प्रारान छिय ॥० ॥

चु हा छुख सरदार चुय सरकार,

पूजा छुय करान दुस सम्सार ।

कर्म फल मेलान चानि कृपाये ॥

बजि दयाये प्रारान छिय ॥० ॥

लोलु छुस आमुत ह्यथ व्यनु पोश,  
 काँयिम थावतम सतुकुय होश ।  
 दर्शुन चानि बनि रुत व्वपाये ॥  
 बजि दयाये प्रारान छिय ॥० ॥

निक्य् बॅङ्ग्य आमुत्य् छिय डेडि तल,  
 म्वख हॉविथ करतु मुशिकल हल ।  
 हलम दॉरिथ आयि चानि आशाये ॥  
 बजि दयाये प्रारान छिय ॥० ॥

क्वकर्म करान असि छिय कमज़ोर,  
 चुय डखि रोज़ख तु लोत गछि बोरे ।  
 यस चुय यावर तस नु परवाये ॥  
 बजि दयाये प्रारान छिय ॥० ॥

अशिवानि छलुहय पादि कमल,  
 पूजायि लागय ब्यल तु मादल ।  
 'जवहरस' पूशितन चोनुय साये ॥  
 बजि दयाये प्रारान छिय ॥० ॥



## नन्दु बब मस्तानु

नन्दु बब मस्तानु गोश थाव नादन,  
 पादन करुयो पोशि पूजा ।  
 सायिबान छुख चुय असि अवलादन ॥  
 पादन करुयो पोशि पूजा ॥० ॥

बब मस्तानु छुख चु बा यख्तियार,  
 सरदार चुय छुख तु चुय सरकार ।  
 नखि डखि हमदम असि उफतादन ॥  
 पादन करुयो पोशि पूजा ॥० ॥

धर्मु गुन्यानु सोस छूख यूगीश्वर,  
 हरु हरु करुनाव तु कास ज़रु ज़र ।  
 फ़ैर्यादन कन थवतु फ़ैर्ययादन ॥  
 पादन करुयो पोशि पूजा ॥० ॥

सम्सॉर्य लूभन डॉल्य् असि होश,  
 प्रकृथ छेट गॅयि तु गॅयि मदहोश ।  
 बबु राजि पूर्यर करसॉ मुरादन ॥  
 पादन करुयो पोशि पूजा ॥० ॥

यँचकाल वोत असि भूगान सख्ती,  
 कष्ट संकट चलि दितु बँखती ।  
 ऑदीनन असि थव पनुन्य् लादन ॥  
 पादन करुयो पोशि पूजा ॥० ॥



साधना प्रौवृथ पेंज तय पूर,

दूर गॅयि गटु फोल नूरय नूर।

भय कास क्षय कर सान्यन अपराधन॥

पादन करुयो पोशि पूजा॥०॥

“नुरकि” सरकार छुख चु महाराजे,

चुय छुख नूरान चुय सरताजे।

मीठ्य ‘जवहर’ दियी पम्पोशि पादन॥

पादन करुयो पोशि पूजा॥०॥



## जगत माता

अँशिस लँज मे दार बु छुस लाचार,

जगत माता चु दार अवतार।

नखन प्यठ छुम ग्वब्यामुत बार॥

जगत माता चु दार अवतार॥०॥

गमव द्वखव बु छुस चोटमुत,

बु बावु कस छुस अँन्दुर्य फोटमुत।

दवा दाद्यन दि बलु बेमार॥

जगत माता चु दार अवतार॥०॥

करान शुर्य बाच चै छिय ज़ॉरी,  
मंगान मंगल छि चैय सॉरी।  
दया दृष्टी चानि बनि शैहजार ॥

ज़गत माता चु दार अवतार ॥०॥

मे जन्मस यिथ तुजिम खॉरी,  
दितम शक्ती करुम मे यॉरी।  
चु राजिरेन्य् पानु ख्वद म्वख्तार ॥

ज़गत माता चु दार अवतार ॥०॥

मे छिम कॅर्यमुत्य् शुमारु रॅस्य् पाप,  
यियिय नय आर तु करतम माफ।  
पथर प्योमुत छुसय हय नादार ॥

ज़गत माता चु दार अवतार ॥०॥

ह्यडान गेलान मे सॉरी छिम,  
करुम अथुरोट चु साहस दिम।  
मे दासस पानु चु भवसुर तार ॥

ज़गत माता चु दार अवतार ॥०॥

बु म्वख्तय दानु पूज़ि लागय,  
जरय 'जवहर' दिलुकि रागय।  
छे लीला चॉन्य् यि अपरम्पार ॥

ज़गत माता चु दार अवतार ॥०॥



## सम्सार भ्रम

रंगु रंगु रंग गौम कौरहस खार,  
सम्सार मुलु द्राव भ्रम तु बौज्यगार ।  
अंग अंग नन्गु गौम छुस वरफतार ॥

सम्सार मुलु द्राव भ्रम तु बौज्यगार ॥०॥

हनि हनि वोलनस मायायि जालन,  
अंधकार वोलनम मदन, मोहन, कामन ।  
लूभ ख्यूब व्यतरोवुम मै बिसियार ॥

सम्सार मुलु द्राव भ्रम तु बौज्यगार ॥०॥

अथु गोम सोरुय कथु कथु कैरिथुय,  
रौस्यु गोम बानन यि ओस बैरिथुय ।  
पाप तय प्वन्यु छिम शानन बार ॥

सम्सार मुलु द्राव भ्रम तु बौज्यगार ॥०॥

बौहकुन पकहौ टख लोगुम कदमन,  
सदुमन जौजिनम तावय मै तन ।  
च्युचल मन छुम थावान बैकरार ॥

सम्सार मुलु द्राव भ्रम तु बौज्यगार ॥०॥

चाने येछि बो लछि मन्जु द्रासय,  
 जारु पारु बपजतम शरणय आसय ।  
 सतुकुय होश दिम भवसरु तार ॥

सम्सार मुलु द्राव भ्रम तु बाँज्यगार ॥०॥

‘जवहर’ होवुम म्वल रावुरोवुम,  
 ओप द्रास राज मा पूशीदु थोवुम ।  
 पनुन्यव अथुवय सपदुस फरार ॥

सम्सार मुलु द्राव भ्रम तु बाँज्यगार ॥०॥



## नव दुर्गा

लोलु सान व्वसु द्रवस लँज जायि जाये,  
 नव दुर्गाये पूजा कर ।

आकाँश्य अछु रछु नचने द्राय ॥

नव दुर्गाये पूजा कर ॥०॥

ओकदोहँ पूजान छी शैलपुत्री,  
 द्वयि दोहँ पूज करान ब्रह्मचारनी ।  
 त्रयि दोह छि पूजान चन्द्रघन्टाये ॥

नव दुर्गाये पूजा कर ॥०॥



चूरिम दोहें वर दिवान कुष्मंडा माता,  
 भक्त्यन छे बखशान स्वख तु सम्पदा ।  
 पुंचिमि दोहें गछ शरण स्कन्दमाताये ॥  
 नव दुर्गाये पूजा कर ॥०॥

कात्यानी मातायि शैयिम दोह पूजकर,  
 संतोषि आनन्द करी म्वयसर ।  
 सतुम दोह कालुरात्री छे रक्षाये ॥  
 नव दुर्गाये पूजा कर ॥०॥

ऑठुम दोहें महागौरी कर जय,  
 बाँगरान अमर्यथ स्व अमि दोहें छय ।  
 नवुम दोहें सोदि दात्री रूप छय ।  
 नव दुर्गाये पूजा कर ॥०॥

'जवहरस' ग्रख दिच माजि दुर्गाये,  
 श्रद्धायि सगु वुशकु क्याह व्वपद्याये ।  
 स्वखु स्वछ सुय मंगान सारि प्रजाये  
 नव दुर्गाये पूजा कर ॥०॥



## अथ छोन

छेनि अथु दिम क्याह नावय तारस,

सम्सारु सागरस किथु लबु तार ।

क्याह बनि लाचार दुनियादारस ॥

सम्सारु सागरस किथु लबु तार ॥०॥

जन्मस यिनु पतु नफसुय पोलुम,

चोलुम कोताह गोब प्योम बार ।

क्याह करु बारस नफसि अमारस ॥

सम्सारु सागरस किथु लबु तार ॥०॥

काम, हूध, मोह, मद कूत वरतोवुम,

थोवुम लूभ ख्यूब प्रचरस मंज ।

ललवान रूदुस ख्वनि शाहमारस ॥

सम्सारु सागरस किथु लबु तार ॥०॥

फेरान फ्यूरुस गोशस गोशस,

होशस रूदुम सुच मेय आफ ।

कुस करि अथुरोट बेकुल बिचारस ॥

सम्सारु सागरस किथु लबु तार ॥०॥

गरु गरु कैर्य कैर्य हर मॅशरोवुम,

थोवुम बैर्य बैर्य माल तय ज़र ।

करनावि हख दिथुन छु हॉज़ इन्कारस ॥

सम्सारु सागरस किथु लबु तार ॥०॥

जॉल्य् दिथ सँदरस 'जवहर' अथु गॉम,  
 फॅक्व् गोम गाटुजार छल वॅसिथुय पेम ।  
 दया दृष्टियि चानि छुस बु इन्तिजारस ॥  
 सम्सारु सागरस किथु लबु तार ॥० ॥



## म्योन दिलबर

यियि ना सु म्योन दिलबर,      लागस बु पोशि अम्बर ।  
 लछि नोव म्योन मनोहर ॥      लागस बु पोशि अम्बार ॥० ॥  
 दमु दमु सु छुम मनस मंज,      छांडन बु कवु वनस मंज ।  
 दर्शुन बन्य्म क्षणस मंज ॥      लागस बु पोशि अम्बार ॥० ॥  
 यियि ना सु सोन सालय,      त्रावस बु पोशि मालय ।  
 चावन सु द्वु प्यालय ॥ लागस बु पोशि अम्बार ॥० ॥  
 यँचकाल गव मै प्रारान, दोह राथ ध्यान दारान ।  
 वतुनय बु पान व्वथरान ॥      लागस बु पोशि अम्बार ॥० ॥  
 नमुहस बु लोल पादन,      थवि गोश सु फॅर्ययादन ।  
 यियि कर सु छम मै लादन ॥      लागस बु पोशि अम्बार ॥० ॥  
 यियि हे सु भक्ति वत्सल,      करिहे मै मुश्किलन हल ।  
 रटुहस बु चरण कमल ॥      लागस बु पोशि अम्बार ॥० ॥  
 बोज़ि ना मै हालु अहवाल,      रोज्यम दिलस नु मलाल ।  
 त्रावस बु नॉल्य् सोन्य् माल ॥      लागस बु पोशि अम्बार ॥० ॥



## न्यथ पर हरु हरु

सुबहन तु शामन न्यथ पर हरु हरु,  
गरु गरु छु बाँगरान स्वख तय सावय।  
भावनायि पूजुन मनुकुय मंदर॥

गरु गरु छु बाँगरान स्वख तय सावय॥०॥

हरु हरु कैर्यजे न्यथ प्रभातन,  
थावतन मनि मंज मंजुलिस सावतन।  
हरु हरु चॅलुरावि पानय यमुथरु॥

गरु गरु छु बाँगरान स्वख तय सावय॥०॥

हरुनाव युस परि तस न कैह गम करि,  
कठिनिस सौदरस सुय अपोर तरि।  
हरु नावुय छुय बडि बौड मन्त्र।

गरु गरु छु बाँगरान स्वख तय सावय॥०॥

तनु मनु लोल बरि युस हरुनावस,  
श्रद्धा तावि मंज भक्ति भावस।  
स्वखु दायक छुय कासान ज़रु ज़रु॥

गरु गरु छु बाँगरान स्वख तय सावय॥०॥

भ्रमु मंजु नीरिथ रोज बे गम,  
हरु नाव स्वर अदु चलनय सितम।  
हरु छुय सुत्य सुत्य करतन सरुखरु॥

गरु गरु छु बाँगरान स्वख तय सावय॥०॥

हरु नाव येम्य ह्योत तैम्य लॅब गथ,  
पूरु पौठ्य प्रावान सुय पॅज वथ।  
हरु हरु कैरिथुय तार लागि भवुसरु॥

गरु गरु छु बाँगरान स्वख तय सावय॥०॥



आयतन हरस थाव जुव तय जान,  
पाद अशि सुत्य् छलुस आलुवुस पान।  
पूजायि लागुस लाल 'जवहर' ॥

गरु गरु छु बाँगरान स्वख तय सावय ॥० ॥



## वेष्णाव माता जय जय जय

वेष्णाव माता असि टोठतय, जय जय माता जय जय जय।  
शेरां वाली असि चॉन्य् लय ॥ जय जय माता जय जय जय ॥० ॥  
डेडि तल आमत्य् लोलु लारान, भावनायि सुती पोश चारान।  
पापन तु शापन करतय क्षय ॥ जय जय माता जय जय जय ॥० ॥  
दीनु दिखियन छय चॉनी आश, जगतस सॉर्यसुय चोन प्रकाश।  
आश असि चॉनी गाश हावतय ॥ जय जय माता जय जय जय ॥० ॥  
असि पुशरोवुय चेंय गरु बार, चुय छख रॉछदर चुय सरकार।  
अन्दु वन्द चॉनी पोशिवुन्य् शय ॥ जय जय माता जय जय जय ॥० ॥  
ज्ञॉनी तु दॉनी छख ज्ञानवान, असि हय रोटमुत चोन दामान।  
गटि मंजु कॅडिथुय गाश हावतय ॥ जय जय माता जय जय जय ॥० ॥  
'कटुराहँ' थज़रस प्यठ चोन वास, द्वष्टव तु दानुवव ख्यव अति त्रास।  
शरणागतन छख चु कासान भय ॥ जय जय माता जय जय जय ॥० ॥  
दर्शुन हावतम छम सख कल, पूजायि लागय मादल तु ब्यल।  
लोलु म्वख्तहारस 'जवहर' जरय ॥  
जय जय माता जय जय जय ॥० ॥



## गंगा माता

गंगा माता चु छलुवुन्य् पापन,  
 चै हय पोशि पादन पूज करय ।  
 पूजायि हुंद मेय हावतय साधन ॥  
 चै हय पोशि पादन पूज करय ॥०॥

नट्यव तु नाट्यव द्वद चैय बावय,  
 लागय पोशि गोद्व नाना रंग ।  
 रत्न दीप जालय सुबहन तु शामन ॥  
 चै हय पोशि पादन पूज करय ॥०॥

दर्शनु सुत्य् छख दौद्व बेलुरावान,  
 फोलुरावान सगु गुल तु गुलजार ।  
 वेगुलान काम, हूध व्योजन कासन ॥  
 चै हय पोशि पादन पूज करय ॥०॥

श्रद्धावान दूरि-दूरि प्यठ यिवान लारन,  
 प्रारान गंगुबलु गाठस प्यठ ।  
 श्रान कॅरिथ प्रावान मनु मुरादन ॥  
 चै हय पोशि पादन पूज करय ॥०॥

तपस्या यैलि कॅर 'भागीरथन',  
 वतन यिनु चानि चोल अंधकार ।  
 अमर्यथ बोंगरावान सैद्यन सादन ॥  
 चै हय पोशि पादन पूज करय ॥०॥

कॉलासु वति चुय आकॉश्य वेंछुखय,  
 खेंचुखय जटन मंज शिवनाथस ।  
 आयख मूक्ष दिनि कोरव ज़ादन ॥  
 चै हय पोशि पादन पूज करय ॥० ॥

‘जवहर’ गंगुबल दस्त बस्तु प्रारान,  
 सारान हलमव व्यनु तु ग्वलाब ।  
 माता क्षमा करत मेय अपराधन ॥  
 चै हय पोशि पादन पूज करय ॥० ॥



## ज़गतच राजिरेन्य्

इयकु छुय फ़वलवुनह्यकु क्याह वेंनिथुय  
 म्वख छुय सिरियि प्रज़लान ॥  
 तुलुमुलि तख़्तास प्यठ छख विराजमान ।  
 भँक्त्यन दौद्य कासान ॥

सॉरिसुय ज़गतस गॅट्य गाशरावान ।  
 प्रज़लान चु माहि ताबान ॥

बब मॉज चुय छख कुलहम लूकन ।  
 सायि चोन चुय सायिबान ॥

राजिरेन्य् ज़गतच ज़गतस पालान ।  
 रॉछदर चु बेयि निगहबान ॥

दीवगण सॉरी लोलु छियपूजान ।

चुय छख शाहि शाहान ॥

सम्सार भ्रम छुय असि ब्रोमरावान ।

लूभ ख्यूब बेंडरावान ॥

ऑदीनन दया दृष्टी चुय करान ।

बॉगरान सतुकुय ज्ञान ॥

नखि डखि रूजिथ अथुरोट छख करान ।

सारिनुय ज़ार बोज़ान ॥

यिकुवटु सॅमिथुय नाद छिय लायान ।

दितय मॉज दयायि दान ॥

म्वख्तु माल 'जवहर' छुय पॉरावान ।

पादन तल च़े प्रारान ॥



## मनि कामन

शामु रुपु वछिहथ सुबहन तु शामन,

पूरण करता मनि कामन म्यॉन्य् ।

होल गोम छांडथ शहरन तु गामन ॥

पूरण करता मनि कामन म्यॉन्य् ॥०॥



लछि नावि लागय शेरि चै अछि पोश,  
 विजि विजि बखुशतम च्यतसुय होश।  
 पाद बो छलहय तु रटुहय दामन॥  
 पूरण करता मनि कामन म्यॉन्य्॥०॥

दर्शनु चानि चलि मनुकुय मल,  
 बल दितम पनुनुय छुस बु न्यबल।  
 गूकलु वास छुय किनु बिन्द्राबन॥  
 पूरण करता मनि कामन म्यॉन्य्॥०॥

जसुदा माता छय भाग्यवान,  
 कृष्ण भगवानस ख्वनि ललुवान।  
 मथरायि प्यठु औनुस वासुदीवन॥  
 पूरण करता मनि कामन म्यॉन्य्॥०॥

असि वोत प्रारान गव यँचकाल,  
 छिय शरण आमुत्य् वुछतु सोन हाल।  
 चानि यिनु फवलुनम मै नँव्य् बामन॥  
 पूरण करता मनि कामन म्यॉन्य्॥०॥

शेरि बो लागय 'जवहर' तु लाल,  
 येछि पछि ख्यावथ खिरु खंडु थाल।  
 थनि प्यालु ख्यावान चु गूर्य बालकन॥  
 पूरण करता मनि कामन म्यॉन्य्॥०॥



## मारु मोत

मनि मंज ललुवथ अज्ज यितु सोन,      मै हा छुम मारुमोत चोनुये ।

यँचकाल वोतुम छुस बु प्रारुवोन ॥,

मै हा छुम मारु मोत चोनुय ॥० ॥

दर्शुन हावतम छम चॉन्य् कल,      गटुज्जोल दूर कर मनुकुय मल ।

लँजमुच छम मैय नैत्रन जून ॥

मै हा छुम मारु मोत चोनुय ॥० ॥

छांडान छांडान शहरन गामन,      रातस द्वहस चुय सुबहन तु शामन ।

प्रथ शायि शोलान अनुहार चोन ॥

मै हा छुम मारु मोत चोनुय ॥० ॥

बँखत्य्न् हुंद छुख पालनहार,      त्रन भवनन छुख चुय सरकार ।

पालुवुन तु रछिवुन बतु बब सोन ॥

मै हा छुम मारु मोत चोनुय ॥० ॥

पछि छुस लायान प्रेयमुक नाद, शाद असि दिल गछि बोज्ज फॅर्ययाद

चुय छुख सोनुय कष्टु कासुवोन ॥

मै हा छुम मारु मोत चोनुय ॥० ॥

शेरि चानि शूभानम लछ पोश,      व्यनु पोश,क्वंगु पोश तु अछि पोश ।

‘जवहर’ छु दासा अख चोन ॥

मै हा छुम मारु मोत चोनुय ॥० ॥

## थनि चूर

लछि नाव क्वछि मंज करुया गूर गूरो,

वनि यितमो थनि चूरो लो लो

पूर्य् किन्य् यितमो सिरियि पुरनूरो ॥

वनि यितमो थनि चूरो लो लो ॥०॥

नाव चॉन्य् ग्रॅन्ज रॅस्य् असि छुनु ज्ञान,

गूपीनाथ छुख चु सोन भगवान ।

नेत्रु कमल चॉन्य् छिया मखमूरो ॥

वनि यितमो थनि चूरो लो लो ॥०॥

पदि पदि छछंडथ बिन्द्राबनसुय,

दर्शुन हावतो अँक्यसुय क्षण सुय ।

यिनु चानि फ्वलिह्यम दिलकुय दूरो ॥

वनि यितमो थनि चूरो लो लो ॥०॥

म्वरलीदरु छुख चु कन्हया लाल,

भज गोविंदम भजु गोपाल ।

असवनि म्वखु छुख कनुके दूरो ॥

वनि यितमो थनि चूरो लो लो ॥०॥

वासदीव नन्दबाबनि नन्दुलालो,

कन्सस क्युत बॅनिथ आख महा कालो ।

दिवकी हुन्दि हा बालु चॅन्दॉरो ॥

वनि यितमो थनि चूरो लो लो ॥०॥

गीता व्वपदीश ज्ञानु आगुर छुय,  
 अमर्युत रूपी भावु सौदुर छुय।  
 फलदायक छुय म्यूठ मौदूरो॥  
 वनि यितमो थनि चूरो लो लो॥०॥

सारिनुय बॅखत्य्न बोज़साँ फॅर्ययाद,  
 गमु मंज सॉरिय करतख आज़ाद।  
 लागियो 'जवहर' मनु स्वनु दूरो॥  
 वनि यितमो थनि चूरो लो लो॥०॥



## भगवान गुपु बब

हमु दमु छम मेय चॉनी कल,  
 गुपु बब वरतम पादन तल।  
 भावुनायि छलुहय चरण कमल॥  
 गुपु बब वरतम पादन तल॥०॥

दस्तार शेरि क्याह छुय शूबान,  
 डैकि छुय क्वंग ट्योक रव प्रज़लान।  
 शमु दमु चानि च़ल्यम गांगल॥  
 गुपु बब वरतम पादन तल॥०॥

मायि छिय सॉरी गुपु बबु वनान,  
 साधुकन साक्षात छुख भगवान।  
 बबु राजि मै ति कासतु मनुसुय मल॥  
 गुपु बब वरतम पादन तल॥०॥



कति अनु तिछ ज्यव ग्यव चॉन्य् ग्वण,  
 पज़ि लोलु करुहय ग्वणु गायन ।  
 मोह, मद तु लूभ ख्यूब चलिहेम जल ॥  
 गुपु बब वरतम पादन तल ॥० ॥

दामानु चोन असि रोटमुत छुय,  
 जान पान च़ेय पुशरोवमुत ।  
 मटि छुय पानु कर मुशिकल हल ॥  
 गुपु बब वरतम पादन तल ॥० ॥

बबु यस च़ु यावर तस क्याह गम,  
 अज्ञान गटि मंज़ु म्वकलावतम ॥  
 ज्ञानवानु दितु मे धर्मुक बल ॥  
 गुपु बब वरतम पादन तल ॥० ॥

दोनि चानि लागुहय कर्मुक ज़्युन,  
 ग्यव च़न्दुन तु सामग्री लागहस हुमुन ।  
 शक्कर, पम्बच, बादाम, वुशकु, श्रुफल ॥  
 गुपु बब वरतम पादन तल ॥० ॥

धर्मु पुछि लागुहय खास वरधन,  
 पॉर्य लगुहय लोलु समवादन ।  
 'जवाहर' वली हुबु ज़ॅरी तु मखमल ॥  
 गुपु बब वरतम पादन तल ॥० ॥



## दीवीदारन जय जयकार

अँस्य् आयि लारन वति वति छारन,

दीवीदारन जय जयकार ।

व्यनु तय ग्वलाब छिय हलमव सारन ॥

दीवीदारन जय जयकार ॥०॥

शारिका पर्वतु शूबान थज़रस,

ख्रुवि छय ज़ाला सन्म्वख स्यज़रस ।

तुलमुलि रॉगिन्या अमर्यथ सारन ॥

दीवीदारन जय जयकार ॥०॥

द्रायि 'शार्दा' प्यठ कोह तेन्तालस,

'नारदा' प्रत्यक्ष प्यठुकनि बालस ।

कृष्ण गंगा अति पाप शाप न्यवारन ॥

दीवीदारन जय जयकार ॥०॥

हंदुवारि 'भेंद्रकॉली' छनि पूजन,

'मंगला' गोंड गुशी बॅख्ताय्न् तारन ।

अमरनाथ अमरेश्वर लिंगु रुफ दारन ॥

दीवीदारन जय जयकार ॥०॥

गंगा हरुम्वखु प्यठ कोहें तालस,

वावुजनु शीशिनाग ख्वनि मज़ बालस ।

वरुमुलि कूटी तीर्थ भवुसर तारन ॥

दीवीदारन जय जयकार ॥०॥

रेश वारि नैमित्तव गोशन गोशन,  
 तति दीवी स्थल वुछिनस नु पोशन।  
 ग्रॅन्ज रॅस्य् दीवी बल गामन शहरन॥  
 दीवीदारन जय जयकार॥०॥

तीर्थन 'जवहर' फ्यूर तरफातन,  
 कुल कॅशीरि वोतनु गोस विस्थापन।  
 नाद येलि वात्य्स तैथ्य् छु प्रारन॥  
 दीवीदारन जय जयकार॥०॥



## यियिना पाद छलुहस

लालस छुस दिवान नाद, यियिना पाद छलुहस।  
 मंगुहस मनुकी मुराद॥  
 यियिना पाद छलुहस॥०॥

वंदुहस जुव तय जान, अर्पण करस टॉठ्य प्राण।  
 मनि मंज रटुहस पाद॥  
 यियिना पाद छलुहस॥०॥

पूजहन तु द्वद बावस, येछि पछि दुफ ज़ालस।  
 अकुहौत दिल गछि शाद॥  
 यियिना पाद छलुहस॥०॥

भूगान वॉन्सि वोत द्वख,      तँहन्दि दर्शनु बनि स्वख ।  
 बोज़िना म्योन फॅर्ययाद ॥  
 यियिना पाद छलुहस ॥० ॥

पापव बु गीर कोरमुत,      शापव मे सूर कोरमुत ।  
 प्योमुत छुस बु उफताद ॥  
 यियिना पाद छलुहस ॥० ॥

अहं अहंकार चलिहे,      काम, हूध, पानु गलिहे ।  
 कथि म्यानि दियिहे दाद ॥  
 यियिना पाद छलुहस ॥० ॥

तस प्रारान सपुद शाम,      ज़ांह ति मा तुल मे आराम ।  
 म्योन मा ज़ांह ति प्योस याद ॥  
 यियिना पाद छलुहस ॥० ॥



## बालु गूपाल

भावनायि करुहय पोशन मालो, बालु गूपालो छुय सोन साल ।  
 लगुयो पादन बोज़ अवहालो ॥  
 बालु गूपालो छुय सोन साल ॥० ॥

मनि अन्दर थावथ भावुनाये,      ल्वलि ललुनावथ जायि जाये ।  
 अँछ मे लोसम यिख कमि हालो ॥  
 बालु गूपालो छुय सोन साल ॥० ॥



च्वापॉर्य वॅल्युमत्य् अँस्य् अंधकारो, ख्वद गर्जी हुँद्य् व्यवहारन ।

तंग आयि संकट कोताह चालो ॥

बालु गूपालो छुय सोन साल ॥० ॥

सम्सॉर्य भ्रमुनय ब्रोमरॉव्युमत्य्, मोह मायाये व्यसरॉव्युमत्य् ॥

द्वख भूगान गॅयि वॉन्स व्वबालो ॥

बालु गूपालो छुय सोन साल ॥० ॥

लछि नावि लागय भावु पोश शेरे, व्यनती बोज़ द्यव होश फेरे ।

नॉल्य् बो त्रावय म्वख्तय मालो ॥

बालु गूपालो छुय सोन साल ॥० ॥

त्रुज़गत नाथु छुख पालन हॉरी, बॅखत्य्न् कासान संकट सॉरी ।

सारिनुय ज़ीवन हुन्दि रश्रपालो ॥

बालु गूपालो छुय सोन साल ॥० ॥

लालु म्यानि करुयो पोशि वर्शुनुये, 'जवहरस' हाव श्वबु दर्शुनुय ॥

बॅर्य बॅर्य थावुयो द्वदु हरु प्यालो ॥

बालु गूपालो छुय सोन साल ॥० ॥



## स्वरतु ज़ीवु राम नामय

कर कर्म चु नेष्कामय,      स्वरतु ज़ीवु राम नामय ।  
प्रावख पर्मु धामय ॥      स्वरतु ज़ीवु राम नामय ॥० ॥

तुलि मुलि वस श्रानस, पूजकर भगवानस ।  
स्मरुन चार धामय ॥      स्वरतु ज़ीवु राम नामय ॥० ॥

डंजि थाव ह्यस तय होश,      लागुस बावु पम्पोश ।  
वलतस ज़ेरी जामय ॥      स्वरतु ज़ीवु राम नामय ॥० ॥

प्रेयमु भाव पूर पानुनाव, देहें भाव पूर मनसाव ।  
पोज़ भाव सुबु शामय ॥      स्वरतु ज़ीवु राम नामय ॥० ॥

समय गोम ज़न्म भूगान, म्वखती छुसनु लबान ।  
आवा गवन नु म्वकलानय ॥      स्वरतु ज़ीवु राम नामय ॥० ॥

नालुमति रटुन दिलबर, कासी सुय यमु थर ।  
यियी सोरुय अंजामय ॥      स्वरतु ज़ीवु राम नामय ॥० ॥

युन तु गछुन छु सम्सार,      अंदवाति पोज़ व्यवहार ।  
तार दियि सत्नामय ॥      स्वरतु ज़ीवु राम नामय ॥० ॥

‘जवहर’ बु चोनुय दास,      हलम दौरिथि चे निश आस ।  
कास संकटु व्वलामय ॥  
स्वरतु ज़ीवु राम नामय ॥० ॥



## ग्वरु दीव

ग्वरु दीव लगुयो च़ेय पॉरुय पॉरी, असि कर यॉरी ज़ॉरी बोज़।  
 शरणुय आमुत्य् लूक्य् बेंड्य सॉरी॥  
 असि कर यॉरी ज़ॉरी बोज़॥०॥

अमरुथ वाचतो ग्वरुसाने, पाद अँस्य् छलुयो अशिवाने।  
 पूजायि पनुनि दिम अनुवॉरी॥  
 असि कर यॉरी ज़ॉरी बोज़॥०॥

यँचकाल प्रारान वोत डेडि तल, मुश्किल सॉन्य् कर हल जल जल।  
 न्यर्बलनुय कास ज़न्मुच खॉरी॥  
 असि कर यॉरी ज़ॉरी बोज़॥०॥

म्वख छुय प्रज़लवुन सिरियि ताबान, गँट्य सॉरी छुख गशिरावान।  
 माफ कर म्वकलाव पापुन्य् बॉरी॥  
 असि कर यॉरी ज़ॉरी बोज़॥०॥

पंचु भूत चँटिथुय हाव असि वथ, ज्ञान दितु धर्मच हैछिहॉव वथ।  
 कर्मच करुनाव असि ज्ञानकॉरी॥  
 असि कर यॉरी ज़ॉरी बोज़॥०॥

अज्ञानु किन्य् दून साद छिनु ज्ञानान, कांह छा च़े वरॉय बब मॉज लागान।  
 क्याह करव चानि रोस चॉरी तु फ्यॉरी॥  
 असि कर यॉरी ज़ॉरी बोज़॥०॥

'जवहर' छु मजबूर छस लाचॉरी, बस छुख चुय तस कल्याण कॉरी।  
 चानि बरनि आव कासतस खॉरी॥  
 असि कर यॉरी ज़ॉरी बोज़॥०॥



## यनु अँस्य् गरि द्रायि

यनु अँस्य् गरि द्रायि तनु छिनु वारय,  
 मॉज दुर्गा कर चारय सोन ।  
 अँड्य खेयि तापु णायि अँड्य बे मारय ॥  
 मॉज दुर्गा कर चारय सोन ॥०॥

असि क्याह राह ओस असि पेयि सख्ती,  
 म्वक्ती दितु वन्य् करतु अनुग्रेह ।  
 हलि मुशिकल कर नतु गँयि मारय ॥  
 मॉज दुर्गा कर चारय सोन ॥०॥

चलनुय प्यव असि गुरुबार त्रॉविथ,  
 पॉविथ थॉव्य् येम्य् जैम्य् तावन,  
 सैकि सँहरावस त्राव शैहजारय ॥  
 मॉज दुर्गा कर चारय सोन ॥०॥

व्यतरान वोत असि रंगु रंगु सखती,  
 बँखती दितु फ्वलि सैकि गुलज़ार ।  
 चानि दयायि ल्वति असि गोब बारय ॥  
 मॉज दुर्गा कर चारय सोन ॥०॥



जंगबाज़ द्वष्टव कँस्य अँस्य् तंग,  
 नंग रँछ दीवन चँल्य् तति योर ।  
 दक़ज़दुनय छुय चोनुय सहारय ॥  
 मॉज दुर्गा कर चारय सोन ॥० ॥

हनि हनि हन गँज पेयि न्यर्बल,  
 जल कर अथुरोट यिरु गँयि नाव ।  
 नावे नम रठ अदु लगि तारय ॥  
 मॉज दुर्गा कर चारय सोन ॥० ॥

‘जवहर’ हाव नोन कास अंधकार,  
 खार सॉन्य् मटि छय बोज़ वीलुज्ज़र ।  
 चै वरॉय कस अँस्य् करव ज़ारुपारय ॥  
 मॉज दुर्गा कर चारय सोन ॥० ॥



## थावतम गोश

शिव नाथु लगयो पम्पोश पादन,  
 बोज़ फॅर्ययादन थावतम गोश ।  
 मानि चुय ज्ञानान अडुक्कॅल्य् नादन ॥  
 बोज़ फॅर्ययादन थावतम गोश ॥० ॥

सम्सॉर्य मायायि छॅलुरोवुस,  
 अपज़ी तमुहन तम्बुलोवुस ।  
 पायि बडि सायि कर थावतम लादन ॥  
 बोज़ फॅर्ययादन थावतम गोश ॥० ॥

फ्रकु होत आसय च़ेय निश लारान,  
 कलि चानि अनिगटि छालु मारान ।  
 लसनु बसनुक कर चारु वुजारन ॥  
 बोज़ फॅर्ययादन थावतम गोश ॥० ॥

लूभन बु कोरनस च़ेय निशि दूर,  
 मोहॅ अंधकारन कोरनम सूर ।  
 शय छम चॉनी तु चॉन्य् मनि कामन ॥  
 बोज़ फॅर्ययादन थावतम गोश ॥० ॥

न्यर्बल प्योमुत छुस बु बेकस,  
 करु क्याह गछु कोत तय वनु कस ।  
 सर्व शक्तिमान छुख टोठ अवलादन ॥  
 बोज़ फॅर्ययादन थावतम गोश ॥० ॥

वति डॅल्युमत्यून छुख वथ हावान,

पाप तय शाप छुख मनसावान ।

आशि तोशो पूर कर तो वादन ॥

बोज़ फॅर्ययादन थावतम गोश ॥० ॥

सम्सारु सौदरस दितु सॉ तार,

नौन 'जवहर' हाव लौत गछि बार ।

नारु मंजु गुलज़ार प्रोव प्रहलादन ॥

बोज़ फॅर्ययादन थावतम गोश ॥० ॥



## चाने नादय

मॉजॉय आसय चाने नावय,

बोज़ फॅर्ययादय शेरतय लोन ।

कासतम द्वर्गत संकट तु व्य्यज़य ॥

बोज़ फॅर्ययादय शेरतय लोन ॥० ॥

माता चुय छुख चय वरदाता,

बब मॉज बान्धव चुय छुख भ्राता ।

ललुवय हृदयस मंजु चॉन्यु पादय ॥

बोज़ फॅर्ययादय शेरतय लोन ॥० ॥

असि वोत प्रारान गव यँचकालय,  
 रुच नज़रा कर वुछ सोन हाल ।  
 मन छुम व्वदोसी थावतम शादय ॥  
 बोज़ फॅर्ययादय शेरतय लोन ॥० ॥

चुय छख दोखियन द्वख तु दोंघ् कासान,  
 बॅखत्यून विज़ि विज़ि सुत्य् आसान ।  
 सर नोमरिथ आस ह्यथ मुरादय ॥  
 बोज़ फॅर्ययादय शेरतय लोन ॥० ॥

आशावानस गाश मॉज हावतम,  
 ज्ञानु प्रकाश मन गॉशरावतम ।  
 दर्शनु चानि फ्वलि स्वखु नागरादय ॥  
 बोज़ फॅर्ययादय शेरतय लोन ॥० ॥

मॉजॉय बोज़तय म्याँन्य् वीलुज़ार,  
 आवुलुनि मंज़ दितु नावि असि तार ।  
 'जवहरो' माजिय रोज़ान आदय ॥  
 बोज़ फॅर्ययादय शेरतय लोन ॥० ॥



## सायस तल

पायि बडि रछतम सायस तल,  
 दर्शनु चानि चलि मनुकुय मल ॥  
 पूजायि लागय ही तु मसवल ॥  
 दर्शनु चानि चलि मनुकुय मल ॥० ॥



ज्यव दिम ह्यमु चॉन्य् लछिबॅद्य नाव,

मन नपुनॉविथ करख पॉराव ।

छम मनस गन्यामुच चॉनी कल ॥

दर्शनु चानि चलि मनुकुय मल ॥१०॥

पूरि जगतुक छुख चुय सरदार,

परमीश्वर छिय सॉर्य यखतियार ।

दीनु दुखियन छुख करान मंगल ॥

दर्शनु चानि चलि मनुकुय मल ॥१०॥

येम्य् येम्य् प्रॉवय चॉन्य् बॅखती,

तस तस प्राप्त गॅयि म्वक्ती ।

हर विजि कोरथस मायि व्वलुवल ॥

दर्शनु चानि चलि मनुकुय मल ॥१०॥

माया चॉनी छे अपरम्पार,

चैय ऑदीन सोरुय संसार ।

चय रछान त्रिभवनस चैय छुय बल ॥

दर्शनु चानि चलि मनुकुय मल ॥१०॥

शरणागत छिय नाद लायान,

लोलु चानि कम कम साज वायान ।

'जवहर' छु मस गोमुत चरणन तल ॥

दर्शनु चानि चलि मनुकुय मल ॥१०॥

## साल कृष्णो

लालु म्यानि यिखना सालु कृष्णो,  
 ब्व करय पोशन माल कृष्णो ॥०॥  
 दूरुचर कोताह चाल कृष्णो ॥

ब्व करय पोशन माल कृष्णो ॥०॥

गूपाल सानि यितु हाव दर्शुन,  
 लोलु चानि वंदुहोय कॅबीलु तोन ।  
 मायि चानि छिय दिवान नालु कृष्णो ॥

ब्व करय पोशन माल कृष्णो ॥०॥

दोखियन दर्शुन हाव सन्मुख,  
 संकट मोचन चॅलराव द्वख ।  
 लगयो हावु स्वख, चालु कृष्णो ॥

ब्व करय पोशन माल कृष्णो ॥०॥

दीनु दयालु छम चॉनी कल,  
 दर्शनु चाना गछि दूर गांगल ।  
 गूपियन हुंदि रक्षपाल कृष्णो ॥

ब्व करय पोशन माल कृष्णो ॥०॥

नालुमति रटुहस छुम सख लोल,  
 मनि मंज गरु हय र्वनि मन्जोल ।  
 त्रावुहय नॉल्य् खॉल्य् मालु कृष्णो ॥

ब्व करय पोशन माल कृष्णो ॥०॥

बुजरुक ज़र कास छुस नातवान,

मौहँ माया छम ब्रोमुरावान ।

म्बकुलाव येमि जंजालु कृष्णो ॥

ब्ब करय पोशन माल कृष्णो ॥०॥

श्वबु दर्शनस अँस्य् छिय प्रारान,

थनि, द्वद हर छिय प्यालन बरान ।

‘जवहर’ मारि हे तालु कृष्णो ॥

ब्ब करय पोशन माल कृष्णो ॥०॥



## नोन दर्शुन

ग्रँज़ रँस्य् ग्वण छिय छुमनु अनुमानय,

यियिहेम ज्ञानय हाव दर्शुन ।

गटि मंज़ु गाह त्राव छुस अन्जानय ॥

यियिहेम ज्ञानय हाव दर्शुन ॥०॥

कति अनु ज्यव करुहय ग्वण गानय,

सर आलुनावुहय पादन द्वन ।

साज़ तय संतूर वायि शौकु सानय ॥

यियिहेम ज्ञानय हाव दर्शुन ॥०॥

येम्य् चोन नाव ह्योत सुबहन तु शामन,  
तैम्यसय गँयि पूर मनि कामन ।

विजि विजि रोजान तस मेहरबानय ॥

यियिहेम ज्ञानय हाव दर्शुन ॥० ॥

लछि नावि वछि सुय मंज ललुनावथ,  
गूरगूर कॅर्य कॅर्य मनि मंज सावथ ।

गुग मंजुलाह रोजहय अँलुरानय ॥

यियिहेम ज्ञानय हाव दर्शुन ॥० ॥

अकोरुय गोम कोताह कॅर्य कॅर्य,  
कैह नो पलि प्योम अथु गॅम छॅर्य ।

तूल्य् तूल्य् छैन्य् गॉम परमानय ॥

यियिहेम ज्ञानय हाव दर्शुन ॥० ॥

वॉन्स आयि सोरान आम बुजर,

गरु गरु गँछिथुय मोठुम हर हर ।

ल्वकुचार रोवुम सोरि सामानय ॥

यियिहेम ज्ञानय हाव दर्शुन ॥० ॥

पूजहथ क्षण क्षण रातो द्यन,

आराधनायन करुहा नु छ्यन ।

‘जवहर’ त्वता करान येचि सानय ॥

यियिहेम ज्ञानय हाव दर्शुन ॥० ॥



## बोज़तम ऑर्चर

प्रारान डेडितल बोज़तम ऑर्चर,  
गुप बब भगवानु अनुग्रह कर ।  
शरण्य आसय कासतम ज़रु ज़र ॥

गुप बब भगवानु अनुग्रह कर ॥० ॥

शोरि छुय शूबान स्वनु दस्तार,  
डेकि कनि चेंद्रम क्याह शांदार ।  
भावनायि पूज़ान च़ेय हरीहरु ॥  
गुप बब भगवानु अनुग्रह कर ॥० ॥

साधना चॉन्य् छम पॅज़ तय पूर,  
ज़गतस चु बॉगरान पज़रुक नूर ।  
भगवान अनुगेह पूरि पूर कर ॥  
गुप बब भगवानु अनुग्रह कर ॥० ॥

ज़ॉनी चुय छुख दॉनी चुय,  
ही रक्षा कारु बोज़ व्यन्ती चुय ।  
तारुवुनि तार दिम तरु भवसर ॥  
गुप बब भगवानु अनुग्रह कर ॥० ॥

औरुत् आमुत् छिय लारान,  
 छिय दया दृष्टी चानि प्रारान ।  
 लगयो पादन तल असि वर ॥  
 गुप बब भगवानु अनुग्रेह कर ॥०॥

मायि होत आव युस डेडि चानि तल,  
 तस न्यर्बल सुय बखशुथ बल ।  
 हलि मुशिकल गोस द्युतथस वर ॥  
 गुप बब भगवानु अनुग्रेह कर ॥०॥

दूरि प्यठ दास आयि ननुवॉरी,  
 भावनायि छिय करान वीलजॉरी ।  
 वतनुय वथुरय लाल 'जवहर' ॥  
 गुप बब भगवानु अनुग्रेह कर ॥०॥



## राँगिन्या भवॉणी

मुकटुदॉरी शेरस सवॉरी, जय जय राँगिन्या भवॉनी  
 दुर्गा रुपी छख व्वपुकाँरी ॥  
 जय जय राँगिन्या भवॉणी ॥० ॥

तुलुमुलि छखय आसान, बॅखत्य्न चु दाद्य कासान ।  
 अमर्यथ चु बॉगरावान ॥  
 जय जय राँगिन्या भवॉणी ॥० ॥

डेडि तल आयि नॅमिथुय, शुर्य बॅड्य सॉर्य सॅमिथुय ।  
 पादन तल छि पैमुती ।,  
 जय जय राँगिन्या भवॉणी ॥० ॥

राजिरोन्य चु मॉज म्यॉनी, त्रुजगतुच हय महारॉनी ।  
 करतय असि पासबॉनी ॥  
 जय जय राँगिन्या भवॉणी ॥० ॥

दासन चु बोज़ि फॅर्ययाद, गमु मंज़ करुख आज़ाद ।  
 लोलु हॅत्य् छुस दिवान नाद ॥  
 जय जय राँगिन्या भवॉणी ॥० ॥

दयायि चानि बनि मे मंगल, मुश्किलन नेर्यम मे हल ।

कासतम चु मनुसय मल ॥

जय जय रॉगिन्या भवॉणी ॥० ॥

बॉगरान चु लोलु प्रसाद, युस रटान सुय गछान शाद ।

कष्ट मंज गछान आजाद ॥

जय जय रॉगिन्या भवॉणी ॥० ॥

करुवुन्य जगतस कल्याण, स्वख तु सम्पदा बॉगरान ।

‘जवहरस’ ति गछ मेहरबान ॥

जय जय रॉगिन्या भवॉणी ॥० ॥



## हरे रामो

कजि ज़ेवि करान फॅर्ययाद, बोज़तम हरे रामो ।

बेबस छुसय दिवान नाद ॥ बोज़तम हरे रामो ॥० ॥

लागय चै पोशि मालय,

वलय मखमॅल्य दुशालय ।

यिखना सानि सालय ॥

बोज़तम हरे रामो ॥० ॥

सखती करतु समाप्त,

शान्ती गछि हेम प्राप्त ।

बॅखती करतम व्याप्त ॥

बोज़तम हरे रामो ॥० ॥



बोंगरान छुख चु अमरुथ,      बॅर्य बॅर्य मलुरुथन क्यथ ।  
 मस्त गछान सॉरी चथ ॥      बोज़तम हरे रामो ॥० ॥  
 बेकसस करुम मे यॉरी,      द्वख चलन चलि रवॉरी ।  
 लागय लोलु पोश बॉरी ॥      बोज़तम हरे रामो ॥० ॥  
 द्वदु ख्वर छलय भावय,      खिरु तु कन्द आपरावय ।  
 बखुशतम स्वख तु सावय ॥      बोज़तम हरे रामो ॥० ॥  
 कौत्याह ज़न्म मे दॉरिम,      कम कम रुफ प्रॉविम ।  
 अटुसुय मे पाप खॉरिम ॥      बोज़तम हरे रामो ॥० ॥  
 लागय बु म्वखतु 'जवहर',      सारय बु पोशि अम्बर ।  
 घन् राथ परु हरु हरु ॥      बोज़तम हरे रामो ॥० ॥



## जय लक्ष्मी माता

लॅक्ष्मी माता बोज़तय जॉरी,  
 हॉरी लगुयय पॉर्य पॉरी ।  
 पादि पूजाये दितु अनुवॉरी ॥  
 हॉरी लगुयय पॉर्य पॉरी ॥० ॥

मनि मंज़ ललुवथ करय गूर गूर,  
 दर्शुन हाव कर नज़राह पूर ।  
 नूर आगुर छख कास अंधकॉरी ॥  
 हॉरी लगुयय पॉर्य पॉरी ॥० ॥

चानि दर्बारय कुस द्राव खॉली,  
पोशि वर्शुन करय यितु सोन सॉली ।

ऑदीनन छख पालन हॉरी ॥

हॉरी लगुयय पॉर्य पॉरी ॥० ॥

अज़ छुय श्वब दान अज़ हाव दर्शुन,  
सन्म्वख यितु कर अथुरोट ।

डेडि तल प्रारान नर तय नॉरी ॥

हॉरी लगुयय पॉर्य पॉरी ॥० ॥

चोन ज़न्म द्वह गाह दिवान सम्सारस,  
रंगु रंगु ज़ूलाह दारस दारस ।

गरु गरु दर्शनुच असि इन्तिज़ारी ॥

हॉरी लगुयय पॉर्य पॉरी ॥० ॥

शेरि चानि शूबान 'जवहर' तु लाल,  
मॉजॉय अज़हय छुय सोनुय साल ।

स्वनु तु र्वफ लागय म्वख्तु जालॉरी ॥

हॉरी लगुयय पॉर्य पॉरी ॥० ॥



## अस्तोती

आयि सॉरी मायि लारान,  
मायि चाने पोश चारान,  
छिय करान अँस्य् अस्तोती,  
पूज़ि लागोय भगवँती ॥०॥

अज़ छु शवब द्यून हाव दर्शुन,  
पाद छलुहोय नाद लायिहोय ॥  
पोशि वरुन अँस्य् करोय ।  
शाद तावतय भगवँती ॥०॥

पाप बँखत्यन छख चु कासान,  
अरु आमत्य् पथरि पेमत्य् ॥  
शाप कासान पूरि पूर ।  
करतु अथुरोट भगवँती ॥०॥

क्याह गछिय कम कर दया मे,  
हचर लदसुय बर मुचर तय ॥  
कर कृपा छुस दास चोन ।  
शवब नज़र कर भगवँती ॥०॥

चानि बर तल आय नँमिथुय,  
आरुहँत्य् साधक छि आमत्य् ॥  
करनि सँमिथुय अर्चना ।  
चैय शरण छिय भगवँती ॥०॥

कर दया असि दीन दोखियन,  
सर्व मंगल मंगलाय छख ॥  
पायि बँड छख मॉज सॉन्य् ।  
करि असि मंगल भगवँती ॥

स्वखु तु शॉन्ती हुंज चु आगुर,  
'जवहरस' कर सायि पनुनुय ॥  
द्वछि द्वछे स्वख बॉगरान ।  
भावु स्मरण छुय नैती ॥०॥



## गवरी शंकर

गवरी शंकर कल्याण काँरी, शिवरात्री द्वहें ज़ॉरी बोज़।  
चानि पूजायि हुंज कॅर तयॉरी ॥ शिवरात्री द्वहें ज़ॉरी बोज़ ॥०

रंगु रंगु तंग आयि गोब गव बार, अथुरोट करवन्य् यीनय आर।  
व्यन्ती छिय करान नर क्यो नॉरी ॥ शिवरात्री द्वहें ज़ॉरी बोज़ ॥०

चवापॉर्य अनिगट हाहाकारय, अपजुय व्यापार अपुज व्यवहारय।  
तालि किन्य् छठ कॅड हुठ्य संसॉरी ॥ शिवरात्री द्वहें ज़ॉरी बोज़ ॥०

फॅर्ययाँद्य आयि अँस्य् व्यन्ती बोज़, संकटु मंजु कड नखि डखि रोज़।  
कष्टु न्यवॉरिथ कासतय खॉरी ॥ शिवरात्री द्वहें ज़ॉरी बोज़ ॥०

असि रोट केवल चोनुय दामान, पूजा छिय करान श्रद्धायि सान।  
पाद हसॉ ललुवोय अँस्य् अशिदॉरी ॥ शिवरात्री द्वहें ज़ॉरी बोज़ ॥०

ब्यल तय मादल दुप तय कोफूर, वायव घंटायि साज़ु संतूर।  
थालुजि डाबुरि शंख शब्द ज़ॉरी ॥ शिवरात्री द्वहें ज़ॉरी बोज़ ॥०

अज़ छे हररात्री व्वत्सव चोनुय, ज़ानुवुन हाल छुख कास ग्रोनुय।

‘जवहर’ ति रुत्यसुय हलम दॉर्य दॉरी ॥

शिवरात्री द्वहें ज़ॉरी बोज़ ॥० ॥





## संत्वष्ट रोज़तम

संत्वष्ट रोज़तम बोज़तम ज़ॉरी, दुर्गा माता कर व्वदार ।  
सॉस्वसुय ज़गतस छखय व्वपुकाँरी । दुर्गा माता कर व्वदार ॥०॥

छलु छिदरि सुती कॅर खानुदॉरी, चॉरी तु फ्यॉरी करुहव क्याह ।  
अज्ञान कास मॉज दितु गाटुजॉरी ॥ दुर्गा माता कर व्वदार ॥०॥

काम हूधस लॅगि अँदु तुज खॉरी । मोहॅ, मद, अंहकार त्रौव मा ज़ांह ।  
धर्मस तु कर्मस दिथ थॅव्यु तॉरी ॥ दुर्गा माता कर व्वदार ॥०॥

स्मरन चॉन्य करान दीवताह सॉरी, दीवियि छय करान भाव मोरु छल ।  
हाल भावुनि अँस्यु आयि ननुवॉरी ॥ दुर्गा माता कर व्वदार ॥०॥

न्यर्धन तु न्यर्बल छिय अँस्यु बिचॉरी, प्रारान डेडि तल हावि दर्शुन ।  
द्वख तु व्याँज पोत ह्यन बलि बेमॉरी ॥ दुर्गा माता कर व्वदार ॥०॥

श्वब दर्शुन हाव ही मुकटुदॉरी, कालु सम्हॉरी करतु व्वपकार ।

‘जवहरस’ कर दया छु सीवा काँरी ॥

दुर्गा माता कर व्वदार ॥०॥



## करतय व्वपुकार मॉजॉय

दासस बोज़ि ज़ारुपार, करतय व्वपुकार मॉजॉय ।  
चुय शुर्यन छख तर्फदार ॥ करतय व्वपुकार मॉजॉय ॥० ॥

चोनुय छु सोर सम्सार, चुय हय आलमुच सरदार ।  
सरकार चु बा यखतियार ॥ करतय व्वपुकार मॉजॉय ॥० ॥

चै वरॉय कांह नय दर्दिल, चरण कमलन वंदय शिल ।  
गोड दिमय बारम्बार ॥ करतय व्वपुकार मॉजॉय ॥० ॥

फवलवुन छु ड्यकु चोनुय, प्रोन म्वख असुवोनुय ।  
अनुहार रुत चै आकार ॥ करतय व्वपुकार मॉजॉय ॥० ॥

दया दृष्टी करखना, नादन कन थवखना ।  
नारस फवल्य्म मै गुलज़ार ॥ करतय व्वपुकार मॉजॉय ॥० ॥

अर्पन करु हय बु पान, ध्यान दारुहय दितम ज्ञान ।  
वरदान चानि बनि तार ॥ करतय व्वपुकार मॉजॉय ॥० ॥

क्षमाश्वरी छख दिलु व्वदारय, ज़ारुपारय छुय 'जवाहर' करान ।  
दर्शनकुय छुस अमार ॥ करतय व्वपुकार मॉजॉय ॥० ॥

## मन मंदर

गरु गरु कैर्य कैर्य हर मँशरोवुम,  
 थोवुम ठोर दिथ मनु मंदरस ।  
 मनशि मोर प्रोवुम तु नाव मंदुछोवुम ॥  
 थोवुम ठोर दिथ मनु मंदरस ॥० ॥

जन्मस यिनु पतु ख्यतु खे लोगुम,  
 मोजुम मकारस मँशरुम दय ।  
 पान वैठरोवुम तु मान गँटरोवुम ॥  
 थोवुम ठोर दिथ मनु मंदरस ॥० ॥

जॉनिथ मॉनिथ पान पॅलुरोवुम,  
 ख्योवुम छ्योट म्योट पाफुय पाफ,  
 संतोष रोवुम तु ह्यस व्यसरोवुम ॥  
 थोवुम ठोर दिथ मनु मंदरस ॥० ॥

मोहँ, मद, काम, हूध, लूभ वरतोवुम,  
 सोम्बुरुम मालुजर सेर मा गोस,  
 गाटुक व्यवहार थदि थँजरोवुम ॥  
 थोवुम ठोर दिथ मनु मंदरस ॥० ॥

गरु वेठ सौम्बरिथ भय हुरोवुम,  
 ललुनोवुम यसलु द्वख तु संकट ।  
 पौज मनसोवुम अपुज वरतोवुम ॥  
 थोवुम ठोर दिथ मनु मंदरस ॥० ॥

खोट खाम छेवुम 'जवहर' त्रोवुम,  
 प्रोवुम तिय यथनु हॉसिल आम ।  
 न्यथु नोन पानाह तापस त्रोवुम ॥  
 थोवुम ठोर दिथ मनु मंदरस ॥० ॥

अथु हावान छुस सोरुय रोवुम,  
 अथु छोन करुनावि अनुकति टूंक ।  
 नहकु शानन पापु बोर गोबरोवुम ॥  
 थोवुम ठोर दिथ मनु मंदरस ॥० ॥





## दीवस छुस दिवान नाद

दीवस छुस दिवान नाद, यियि ना मन गछि शाद ॥	करस फॅर्ययाद यी ना । करस फॅर्ययाद यी ना ॥० ॥
यी ना हावि दर्शुन, गछिहेम पूर मुराद ॥	करहस पोशि वरुन । करस फॅर्ययाद यी ना ॥० ॥
ल्वकुचार गोम जाये, चानि दॅस्य् सपदु आजाद ॥	बुजरस लोगुस तावे । करस फॅर्ययाद यी ना ॥० ॥
समुया गोम प्रारान, माफ करि म्याँन्य् अपराध ॥	नेत्रव खून हारान । करस फॅर्ययाद यी ना ॥० ॥
यियिना गछि मेहरबान, हालस दियि ना दाद ॥	दिल जान करस कुर्बान । करस फॅर्ययाद यी ना ॥० ॥
सु छु बौड बखशनहार, ग्वण छि तस बे शुमार ॥	ऑरत्य्नु हूंद दिलदार । करस फॅर्ययाद यी ना ॥० ॥
हटि गंडस म्वखतय हार, मनि मंज रटुहस पाद ॥	‘जवहर’ जरस बिसियार । करस फॅर्ययाद यी ना ॥० ॥



## चाने कृपाये प्रारान

ही दयि दया मै करतम, चाने कृपायि प्रारान ।  
पादन तल मै वरतम ॥ चाने कृपायि प्रारान ॥० ॥

चॉनी छम मनस कल, दर्शुन हाव मै जल जल ।  
करतु म्यॉन्य् मुश्किल हल ॥ चाने कृपायि प्रारान ॥० ॥

चोनुय छु सोर सम्सार, प्रथ शायि चोन अनुहार ।  
थदि थोद छु चोन दर्बार ॥ चाने कृपायि प्रारान ॥० ॥

छुय अज सोनुय साल, गोश थाव बोज अहवाल ।  
लागय प्रेयम् पोशि माल ॥ चाने कृपायि प्रारान ॥० ॥

वोलुस मायायि जालन, छ्योनुस कोहन तु बालन ।  
गोलनस अँमिय हालन ॥ चाने कृपायि प्रारान ॥० ॥

म्वकुलाव युन तु गछोन, नवि लेख कर्मय लोन ।  
डोलान छु अँड्यजि मोर म्योनचाने कृपायि प्रारान ॥० ॥

‘जवहरस’ छे चॉन्य् लादन, कन थवुस फॅर्ययादन ।

लाल जरिय दून पादन ॥

चाने कृपायि प्रारान ॥० ॥



## प्रणाम भँव्यनय

प्रणाम भँव्यनय चानि मायाये  
 त्रुजगत राये भँव्यनय जय ।  
 सम्सार छु शोलान चानि कृपाये ॥  
 त्रुजगत राये भँव्यनय जय ॥० ॥

चौनी पृथ्वी चोनुय आकाश,  
 प्रकाश चोनुय तु तारागण ।  
 जीवु जौच सारेय चानि यछाये ॥  
 त्रुजगत राये भँव्यनय जय ॥० ॥

हा लछि नाव्यो क्वछि ललुनावथ,  
 थावथ मनि मंज करय गूर गूर ।  
 व्यनु पोश लागय चानि पूजाये ॥  
 त्रुजगत राये भँव्यनय जय ॥० ॥

पापव तु शापव वुट छुस वौलमुत,  
 डोलमुत छुस करान अपुज व्यवहार ।  
 तारुवनि तार दितु म्याने नावे ॥  
 त्रुजगत राये भँव्यनय जय ॥० ॥

द्वर्दशा कासुवनि दार वन्य अवतार,  
 सतु कुय शौहजार पेयि च्वापौर्य ।  
 भावनायि पूजथ बजि श्रद्धाये ॥  
 त्रुजगत राये भँव्यनय जय ॥० ॥

जामन जरुहोय लाल 'जवहर',  
 कोफूर तनि मलुहोय अमरुचतु दार ।  
 पौरी लगुयो चानि लीलाये  
 त्रुजगत राये भँव्यनय जय ॥० ॥



## रोटमय दामानय

चु थिखना यारि जानानय,  
 मै रोटमय चोन दामानय ।  
 करुम मुश्किल मै आसानय ॥  
 मै रोटमय चोन दामानय ॥० ॥

बु कति छांडथ बयाबानन,  
 दामन रोटमस कॅरमस थफ ।  
 पायि बडि म्याने सायि बानय ॥  
 मै रोटमय चोन दामानय ॥० ॥

मनस मंज छुम स्यठा सख लोल,  
 होल गोम कर यियि म्योन दिलबर ।  
 बु ललुवथ लोलु दुर्दानय ॥  
 मै रोटमय चोन दामानय ॥० ॥

बु छुस वौलमुत मोह जंजालन,  
 हालन पनुनी कौरमुत पथ ।  
 प्योमुत न्यर्बल तु अन्जानय ॥  
 मै रोटमय चोन दामानय ॥० ॥

द्वखव दाघव क्व पौठ्य वौलहस,  
 कौरहस कोल जौर बुय बेहद ।  
 चु छुख अथुरोट करान पानय ॥  
 मै रोटमय चोन दामानय ॥० ॥

छु 'जवहर' चैय करान ऑरचर,  
 मुचर वन्य् बर दयासागर ।  
 मंगान सतुकुय छु सामानय ॥  
 मै रोटमय चोन दामानय ॥० ॥



## दया वन्य् कर

दयालू छुख दया सागर, दया वन्य् कर, दया वन्य् कर ।

विष्णु, ब्रह्म तु महीश्वर ॥

दया वन्य् कर दया वन्य् कर ॥०॥

दयावान छुख चु सोन भगवान, बनाँवुथ धरती सिरिय प्रज़लान ।

बाँगरान कर्मुन बराबर दर ॥

दया वन्य् कर दया वन्य् कर ॥०॥

दिम क्वठ्यन ताकत अँछिनय गाश, चाँनी यछ पछ चाँनी आश ।

करान व्यन्ती च बोज़ आँचर ॥

दया वन्य् कर दया वन्य् कर ॥०॥

ह्यवान युस लोलु येछि चोन नाव, तँमिस कति छुख चु थावान गाव ।

अकिय नज़रे करान मनुवर ॥

दया वन्य् कर दया वन्य् कर ॥०॥

करान व्यन्ती छुसय नैमिथुय, स्यठाह आँजुज बु सपदिथुय ।

दितम शाँन्ती च़न्यम ज़रुज़र ॥

दया वन्य् कर दया वन्य् कर ॥०॥

करय जुव जान च़े प्यठ क्वर्बान, रंगा रंग पोश छिय वर्षान ।

वलय मखमल जरय 'जवहर' ॥

दया वन्य् कर दया वन्य् कर ॥०॥



## गुपु बबु भगवान यॉरी कर

संतवष्ट रोज़तम तु बोज़तम ज़ॉरी,  
गुपु बबु भगवान यॉरी कर ।  
शरणय आमृत्य् निक्य् बँड्य् सॉरी ॥  
गुपु बबु भगवान यॉरी कर ॥०॥

भावनायि सुत्य् छिय गुपु बबु वनान,  
साक्षात चुय छुख सोन भगवान ।  
पादन तल वर लगहोय पॉरी ॥  
गुपु बबु भगवान यॉरी कर ॥०॥

हलि मुश्किल छुय चानी डेडि तल,  
युस आव तस गॅयि मुश्किल हल ।  
अँस्य् छिय आमृत्य् हलम दॉर्य दॉरी ॥  
गुपु बबु भगवान यॉरी कर ॥०॥

आशायि आमृत्य् बोज़ असि ज़ार,  
न्यथुनँन्य् नयर्बल यियनय आर ।  
कुच्चाह चालव मारा मॉरी ॥  
गुपु बबु भगवान यॉरी कर ॥०॥

साधना प्रॉवुथ पॅज तय पूर,  
गटु कौसुथ गॅयि अनिगट दूर ।  
पछ ह्यथ आमृत्य् छिय नरु नॉरी ॥  
गुपु बबु भगवान यॉरी कर ॥०॥

न्यर्बलस फेकि खौत गोब बार,  
चन्दु छेनिसुय बनि कति तार ।  
कोठ्य लूस्य मुचराव बरन्यून तौरी ॥  
गुप बब भगवान यौरी कर ॥० ॥

शेरि हुंद दस्तार छुय शूबवुनुये,  
तनि दार फ्यरनस नु म्वलवुनुये ।  
'जवहर' मालु लागुनस करान तयौरी ॥  
गुप बब भगवान यौरी कर ॥० ॥



## जगि हुंदि रक्षपाल

जगि हुंदि रक्षपालु जानानो, सन्त्वष्ट रोजतम भगवानो ।  
पनुनि अथु करतम सायि बानो ॥  
सन्त्वष्ट रोजतम भगवानो ॥० ॥

त्रुजगत नाथु भक्ति वत्सल चुय, वेशनार्पन बल दिम मे सतुकुय ।  
सन्म्वख म्वख हाव स्वखुसानो ॥  
सन्त्वष्ट रोजतम भगवानो ॥० ॥

लछि बॅद्य नाव चॉन्य लछिनावो, नज़रे शफा कर मे दौद्य बलुनो ।  
मनु आसुनस बेहतु शाहानो ॥  
सन्त्वष्ट रोजतम भगवानो ॥० ॥

स्वछ चोन जगतस शायि शाये, चाने माये त्रिभवन वोल ।

अनिगटु गॉशराव दुर्दानो ॥

सन्त्वष्ट रोजतम भगवानो ॥० ॥

पकुनावान छुख जगतुच नाव, दरियावु चानि सुत्थ सुंदरन रव ।

भवसरु तार दिम भगवानो ॥

सन्त्वष्ट रोजतम भगवानो ॥० ॥

कति अनु ब्वद युथ ग्यव चॉन्ग् वण, ज्वन दिम अदु यियि पजरुक ज्ञान ।

अज्ञॉनियन कर दया दयावानो ॥

सन्त्वष्ट रोजतम भगवानो ॥० ॥

समयन 'जवाहर' कौर पामाल, कंगाल कौरमुत छु इसराफन ।

पानु छुख हाल सोन ज्ञानानो ॥

सन्त्वष्ट रोजतम भगवानो ॥० ॥





## चारान ही तु मसवल

छुसय लालो बु च़ेय प्रारान,      बु च़ारान ही तु बैयि मसवल ।  
छुसय बरतल हलम दारान ।।      बु च़ारान ही तु बैयि मसवल ।

गनेमुच़ छम मनस च़ॉन्य् कल,      मै जल जल हावतम दर्शुन ।  
बु नैत्रव खून छुस हारान ।।      बु च़ारान ही तु बैयि मसवल ।

मै काम, हूध, लूभ मद वरतोवुम,      मनस मंज़ ख्यूब गॅनिरोवुम ।  
बु पॉन्य् पानस बॉज़्य् वरतावान ।।      बु च़ारान ही तु बैयि मसवल ।

च़ै रोस कस वनु तु कुस बोज़्य्म      तु रोज़तम सुत्य् सुत्य् मदतस ।  
च़ु फुचिमच़ि नावि छुख तारान ।।      बु च़ारान ही तु बैयि मसवल ।

कजर छुम छुस बु मुलतलु कौल,      दितम शक्ती बु ग्यवुहय ग्वण ।  
रुतिस साज़स बु तारु च़ारान ।।      बु च़ारान ही तु बैयि मसवल ।

मै अर्मान वोत तनय ललुवान,      यनय मनि च़ॉन्य् गनेयम कल ।  
अँछ्य लोसम मै वतु वुछान ।।      बु च़ारान ही तु बैयि मसवल ।

यि 'जवहर' म्वलुवनय यियिहे,      अगर लाल म्योन खबर हैयिहे ।।  
मै तस सुत्य् आदनुक यारन ।।      बु च़ारान ही तु बैयि मसवल ।



## करुम अथुरोट

बु आसय लोलु लारानो,  
 करुम अथुरोट मै नारानो,  
 छुसय बर तल बु प्रारानी ॥  
 करुम अथुरोट मै नारानो ॥०॥

छुसय कजि जैवि दिवान बो नाद,  
 शरण आमुत करान फॅर्ययाद ।  
 हरान ओश खूनि बारानो ॥  
 करुम अथुरोट मै नारानो ॥०॥

द्वखव दाद्यव अँन्दर्य गोलुस,  
 बु ज़ोलुस अहम हूधन पूर ।  
 दवा दाद्यन बु छारानो ॥  
 करुम अथुरोट मै नारानो ॥०॥

दिमुय गोड बुय अशिवाने,  
 दितम दर्शुन मै नुन्दबाने ।  
 बु सौम्बरय संज तु सामानो ॥  
 करुम अथुरोट मै नारानो ॥०॥

रटय मनि पादि कमल चॉन्य,  
 गछन स्वनु सॉव्य् मून्य् चीन्य् म्यान्य्।  
 बु चोनुय दान दारानो॥  
 करुम अथुरोट मै नारानो॥०॥

सितम कौत्याह मै दिन्य् लूभन,  
 कौरिस बुर्बाद स्यठाह हूधन।  
 बु ठंजिल्य्न पोन्त्य् सारानो॥  
 करुम अथुरोट मै नारानो॥०॥

बु छुस डौख 'जवहरस' चोनुय,  
 चु कासुस काचु जूनि ग्रोनुय।  
 परेशान गुल्य् सु मूरानो॥  
 करुम अथुरोट मै नारानो॥०॥



## यिहमना यूर्य कलवालो

- बैरिथ मसुकी हा छिय प्यालो, यियहमना यूर्य कलवालो ।  
 चे हा छुय म्यानि गरि सालो ॥ यियहमना यूर्य कलवालो ॥०
- मे प्रारान वोत यँचकालो, छुसयना नाद लायानो ।  
 दिवान क्याह दुर्दु हँत्य नालो ॥ यियहमना यूर्य कलवालो ॥०
- चु कँम्य सना यूत तंबुलोवुख, खँटिथ गारन ग्वफन थोवुख ।  
 पॅरी कमि न्यूख पॅरिस्तानी ॥ यियहमना यूर्य कलवालो ॥०
- न कुनि चोन पय पताह नेरान, कमन मरगन नयन चु फेरान ।  
 कत्यू लबु चोन ठीकानो ॥ यियहमना यूर्य कलवालो ॥०
- बु कस वनु वाय मे क्याह गुदस्योव, स्यठाह मुशिकल हिजर बास्योव ।  
 मे प्यतरुन प्यव कोहिस्तानो ॥ यियहमना यूर्य कलवालो ॥०
- यि दूर्यर चोन क्यथो चालय, मे कौरमुत पान चे हवालय ।  
 चु यितु वापस छुय सवालो ॥ यियहमना यूर्य कलवालो ॥०
- यि 'जवहर' हाविही जवहर, चे त्राविही पादुनुय तल सर ।  
 चु गछतस बर महेरबानो ॥ यियहमना यूर्य कलवालो ॥०





## नादानो पानो चेन

सूंच सूंच कदम तुल वारु थाव दानो, नादान पानो चेन ।

डींश डींश सम्सार गछ मु त्रेंहरानो ॥

नादान पानो चेन ॥० ॥

कैंह छुन रोज़ुवुन कथुन गछि फानो, येति नो कुनि बकॉय छय ।

कथ कुन होवनय कथ चु सोम्बरानो ॥

नादान पानो चेन ॥० ॥

अपजुय छु दुनियाह सोर नु नेरानो, कवु छय अमिच मालय ।

ब्रुन्ज्युक नु पय, वहरुक छु सामानो ॥

नादान पानो चेन ॥० ॥

ज्यनु गरि कौत्याह ख्वश छि सपदानो, च्वचि शीरीन्त् बाँगरान ।

कैंचि दौह्य पोत च़ालान अथु हावानो ॥

नादान पानो चेन ॥० ॥

बॉर खर बॅनिथ शुर्य तु बॉच प्यतरानो, तिम छिय रतस ज़ागान ।

चंदु छेनिसुय तिम छि पॅन्द् कड़ानो ॥

नादान पानो चेन ॥० ॥

योर् युस आव सु छु तूर्य सखरानो, नेकस सुलि बदस चीर्य पहन लार ।  
 ज्यनु ब्रोंठ छिय पटस मरुन लेखानो ॥  
 नादान पानो चेन ॥० ॥

छु य्वहय छु राजि हयात, नेकस जनथ अनान बदस व्वहवानो ।  
 म्वछि वॅटिथ यिवान तु अथु मुचरिथ गछानो ॥  
 नादान पानो चेन ॥० ॥

इन्सान मरि युस छु फर्ज मॅशरानो, सुय छु ऑकबत रावुरान ।  
 असलियथ त्रॉविथ बनान खुरसानो ॥  
 नादान पानो चेन ॥० ॥

कुन छुय कर्तव्य रोज सु पालानो, रोज ख्वद गर्जी निशि पाक ।  
 व्वथुवुन बेहवुन रोज दय स्मरानो ॥  
 नादान पानो चेन ॥० ॥

सॉयिलन कन व्यॅनच ऑज़ि थावानो, आहस मंज छु भगवान ।  
 यिनु ज़ांह ति आसुहख हुनु द्रुनु करानो ॥  
 नादान पानो चेन ॥० ॥

'जवाहर' गरि गरि थोक यिय् स्वरानो, नाहक पानो छुख बे यख्तियार ।  
 कैह च़ेय तॉन्य् यैति सोरुय बहानो ॥  
 नादान पानो चेन ॥० ॥

## रेशि पीर सॉबस व्यनथ

रेशि पीरु पादशाहँ कन थाव नादन,

लगुहय पादन मुशिकल कुशा ।

हर दो जहां छुख सायि उफतादन ॥

लगुहय पादन मुशिकल कुशा ॥० ॥

नूर आगुर छुख नूर वाहरावान,

त्रावान जगतस शुहलुय गाह ।

साधनायि हुंज वथ बैखत्यून हावन ॥

लगुहय पादन मुशिकल कुशा ॥० ॥

मस्ताना छुख बडि पायि मँहकम,

गम कासवुन पीर पादशाह ।

पूरण करान छुय सान्यून मुरादन ॥

लगुहय पादन मुशिकल कुशा ॥० ॥

तप ज़प कैर्य कैर्य हॉवथ स्व वथ,

सथ असि चॉनी सतुची सथ ।

रुचरुकि रँहबुर चॉन्य् असि लादन ॥

लगुहय पादन मुशिकल कुशा ॥० ॥

अँस्य् आयि दूरि प्यठ योर ननुवॉरी,  
गुल्य् गॅन्डिथ च़ेय शरण सॉरी छिय।  
दर्शुन दितु क्षमा करतु अपराधन॥

लगुहय पादन मुश्किल कुशा॥०॥

मस्तानु ज़ॉनी छुख ज़ानुवाना,  
चावान छुख अमर्यतु ज़ानाह।  
शक्तिपात छुख करान सेद्यन तु सादन॥

लगुहय पादन मुश्किल कुशा॥०॥

गुशि क्वपवारि चॉन्य् मातामाल आँस्य्,  
गूव्यंद मोल स्यदु लॅक्ष्मी यूगी आँस्य्।  
केशवु जरुहय 'जवहर' च़े पादन॥

लगुहय पादन मुश्किल कुशा॥०॥



## वति मो राव

हरु हरु करतो गरु मो त्राव,  
मनशि मोर प्रॉविथ वति मो राव।  
ज़ीवन मंज़ चुय नाव थोद थाव॥

मनशि मोर प्रॉविथ वति मो राव॥०॥



जीवन मंज छय पदवी थेंज,  
 सेज वथ रेंटिथुय प्रावख ज्ञान ।  
 पान प्रजुनॉविथ ज्ञान अजमाव ॥  
 मनशि मोर प्राँविथ वति मो राव ॥० ॥

काँत्याह आयि तय काँत्याह द्राय,  
 संसार ज्ञानतन कारवान सराय ।  
 मनु मंदरस मायि बर मुचराव ॥  
 मनशि मोर प्राँविथ वति मो राव ॥० ॥

येति क्याह लारुन तोत क्याह सारुन,  
 खारुन कथ प्यठ शानन बोर ।  
 शमु दमु पनुनुय पान शोमराव ॥  
 मनशि मोर प्राँविथ वति मो राव ॥० ॥

तारस तँरिथुय बैयि कैह तारख,  
 छारख गंगुबल प्रावख तिय ।  
 अदु यियि आम्यून बानन छाव ॥  
 मनशि मोर प्राँविथ वति मो राव ॥० ॥

आख अय तु कर कैह वख मु रावुराव,  
 य्वहय छुय रुत वेलु प्रण मु मँशराव ।  
 येहँलूक परिलूक चुय नेशिनाव ॥  
 मनशि मोर प्राँविथ वति मो राव ॥० ॥

वरदानु दयि सुंदि म्यूल असि नाव,  
 ब्रह्मण बैनिथुय जन्मस आय ।  
 व्यवहारस मंज 'जवहर' हाव ॥  
 मनशि मोर प्राँविथ वति मो राव ॥० ॥



## रेशि पीर साँबो यॉरी कर

डेडि तल प्रारान निक्क्य बँड्य सॉरी,

रेशि पीरु साँबो यॉरी कर ।

ब्वछि हँत्य् न्यथुन्य् बेयि ननुवॉरी ॥

रेशि पीरु साँबो यॉरी कर ॥०॥

यँचकालु प्रारान दर्शनस छिय,

सोपनिय यितु छु गँनीमत तिय ।

चानि श्वब दर्शनु चलि असि खॉरी ॥

रेशि पीरु साँबो यॉरी कर ॥०॥

नाव मशहूर पीर पंडित पादशाह,

हर दो जहां चुय मुश्किल कुशा ।

यस बु तस बोज्ञान छुख वीलुजॉरी ॥

रेशि पीरु साँबो यॉरी कर ॥०॥

थानु चोन शूबान श्रीनँगरु छुय,

पॉरी तथ अस्तानस बुय ।

लोलु पूजान छिय नर तय नॉरी ॥

रेशि पीरु साँबो यॉरी कर ॥०॥

हलम दौरिथ युस यिवान बरने तल,  
 मुशिकलन हल बनान तस छु जल जल ।  
 शेरि युस लागान पोशि बॉरी ॥  
 रेशि पीरु सॉबो यॉरी कर ॥० ॥

दकुज़द लॅग्य् असि सेकि सॅहरावस,  
 नरुकनि तावु दॅज़मुच असि ताल ।  
 कोताह च़ालव गॅयि वुजॉरी ॥  
 रेशि पीरु सॉबो यॉरी कर ॥० ॥

संसार्य मायायि डॉज असि वथ,  
 अठकल राव असि गॅयि वोजार ।  
 रुचि वति लाग जल कास खॉरी ॥  
 रेशि पीरु सॉबो यॉरी कर ॥० ॥

आलुवय पादि कमलन पनुन पान,  
 शानु थदि करतम पानु कल्याण ।  
 थव मंज़ूर 'जवहरन्य्' म्वखतु जालॉरी ॥  
 रेशि पीरु सॉबो यॉरी कर ॥० ॥



## यियनय आर मॉजॉय

बोज़ि असि बोज़ि ज़ारु पार, पोशन करय हय अंबार ॥	यियनय आर मॉजॉय । यियनय आर मॉजॉय ॥० ॥
ग्वडु थावतम और जान, सन्मुख रोज़ुम बार बार ॥	सोज़तम अन्न धन तु मान । यियनय आर मॉजॉय ॥० ॥
हावतय मै मॉज रुच वथ, गथ करय च़ेय बार बार ॥	गटु कास छम प्रकाशि सथ । यियनय आर मॉजॉय ॥० ॥
मनि मंज़ चोन मन्दर, नारस करुम गुलज़ार ॥	ललवथ तँथ्य् मंज़ श्याम स्वंदर । यियनय आर मॉजॉय ॥० ॥
मोह तु मद करतम दूर, ल्वति हैम पापुन बार ॥	फ़वलिहैम सतुकुय दूर । यियनय आर मॉजॉय ॥० ॥
अख प्रेयम नाव सौरुम, ल्वलि ललुवुम मै ओंकार ॥	मन दयि भाव बौरुम । यियनय आर मॉजॉय ॥० ॥





## शरणागत छु आमुत

शरणागत छु आमुत,	परान छुय रामु रामय ।
चरणन तल नम्यामुत ॥	परान छुय रामु रामय ॥० ॥
गनेमुच छम मनस कल,	दर्शुन हाव मै जल जल ।
राग चोन सख सन्यामुत ॥	परान छुय रामु रामय ॥० ॥
साक्षात छुख चु भगवान,	कर्म द्वख चु कासान ।
नवि लेखुम मै नौव रुत ॥	परान छुय रामु रामय ॥० ॥
पापव छुस बु वौलमुत,	शापव वति डोलमुत ।
गुदर्यव क्याह बन्यामुत ॥	परान छुय रामु रामय ॥० ॥
दया कर दिम मै बैखती,	ज्यनु मरनु निशि मवक्ति
आशावानाह बु आमुत ॥	परान छुय रामु रामय ॥० ॥
यैचकाल गोम प्रारान,	नेत्रव बु खून हारान ।
द्वखव छ्वकुलद बु कोरमुत ॥	परान छुय रामु रामय ॥० ॥
वति वति शहर गामय,	घन तु राथ सुब शामय ।
'जवहर' लबुनि बु द्रामुत ॥	परान छुय रामु रामय ॥० ॥

## प्रारान डेडि तल

अँस्य् आयि माँजँय लोलु हँत्य् लारान,  
 प्रारान अँस्य् हय डेडि तल ।  
 मायि चानि लवु हँत्य् पोश छिय चारान ॥  
 प्रारान अँस्य् हय डेडि तल ॥० ॥

करतु यॉरी बोज़तु ज़ॉरी,  
 सॉरी छि दास चॉनी ।  
 गुल्य् गँन्डिथुय छि ध्यान दारान ॥  
 प्रारान अँस्य् हय डेडि तल ॥० ॥

समया वोत द्वख बूगान,  
 नूरान म्वख पनुन हाव ।  
 पूरु ज़गतस गाह त्रावान ॥  
 प्रारान अँस्य् हय डेडि तल ॥० ॥

ध्यान चोनुय द्वहस रातस,  
 गरि सातस वँन्य् दिवान ।  
 खून नेत्रव दारि हारान ॥  
 प्रारान अँस्य् हय डेडि तल ॥० ॥

बँखत्य्न् छख चु दाँघ् कासान,  
 बाँगरान शादि बिसियार ।  
 मुशिकलव मंज़ बोठ खारान ॥  
 प्रारान अँस्य् हय डेडि तल ॥० ॥

म्वख्तु 'जवहर' जरय हय पादन,  
 सैद्यन सादन आश चॉन्य् ।  
 गाश तय प्रकाश छिय छारान ॥  
 प्रारान अँस्य् हय डेडि तल ॥० ॥



## नन्द बब मस्तानु

नन्दु बब मस्तानु गोश थाव नादन,  
पादन करुयो पोशि पूजा ।  
गटु छठ चॅलराव असि अवलादन ॥  
पादन करुयो पोशि पूजा ॥० ॥

यॅचकालु प्यठु वोत बूगान सख्ती,  
बॅकती दितु गछि सख्ती दूर ।  
ऑदीन आमुत्य् छि थाव असि लादन ॥  
पादन करुयो पोशि पूजा ॥० ॥

श्वद्ध स्वरूप छुख बा यख्तियार,  
सरदार चुय छुख बौड शाहकार ।  
नखि डखि रीज़िथ छुख उफतादन ॥  
पादन करुयो पोशि पूजा ॥० ॥

धर्म ज्ञानु किन्य् छुख यूगीश्वर,  
हर असि संकट कास ज़रु ज़र ।  
फॅर्याद्यन कन थव फॅर्ययादन ॥  
पादन करुयो पोशि पूजा ॥० ॥

संसॉर्य लूभन वोलमुत छुस,  
सतुचे वति निशि डोलमुत छुस ।  
बब राजि पूर्यर कर मे मुरादन ॥  
पादन करुयो पोशि पूजा ॥० ॥

साधना प्रॉवुथ च़ेय पूरि पूर,  
 दूर गँयि अनिगट प्रकाश फ़्यूर ।  
 क्षय करतु सान्यून वोखु अपराधन ॥  
 पादन करुयो पोशि पूजा ॥० ॥

नुनरुकि सरकारु छुख महाराज,  
 राज चोन व्यापक कस छु इन्कार ।  
 लाल 'जवहर' जरय यिमनजूग्य पावस्थन ॥  
 पादन करुयो पोशि पूजा ॥० ॥



## युस परि हरु हरु

युस येति हरु हरु परि लो लो, तस क्याह यमु भय करि लो लो ।  
 सुय येमि भवुसरु तरि लो लो ॥  
 तस क्याह यमु भय करि लो लो ॥० ॥

नेति पूज़ि युस शिव नाथस, कति रोज़न द्वख तु संकट तस ।  
 यमु दुथ तस निशि डरि लो लो ॥  
 तस क्याह यमु भय करि लो लो ॥० ॥



ललुनाव लोलु सान शिव, सुंद नाव, स्वमनु सतुची वथ अजमाव ।  
 सतुचे वति कुस डरि लो लो ॥  
 तस क्याह यमु भय करि लो लो ॥० ॥

हुरुम्बख गॅछिथ बर तल ज़ागस, आगस नॅव्यु नॅव्यु पोश लागस ।  
 ब्रह्म सरु पोशन थरि लो लो ॥  
 तस क्याह यमु भय करि लो लो ॥० ॥

सम्सारु सॅदरस मुश्किल तार, वार वुछिथुय रठ नावे नम ।  
 करनॉवि वुछ कति तरि लो लो ॥  
 तस क्याह यमु भय करि लो लो ॥० ॥

जन्मस यिनु पतु येति कुस रूद, सूदमंद युस गव तॅम्यु लॅब गथ ।  
 अतु गॅथ कस कस फरि लो लो ॥  
 तस क्याह यमु भय करि लो लो ॥० ॥

नाव पुशिरावुन पानु दयवस, हृदयस मंज़ रठ तॅम्यु सुंघ पाद ।  
 पूज़ि लागुस 'जवहर' लो लो ॥  
 तस क्याह यमु भय करि लो लो ॥० ॥

## बालु यार

अज़हय यियि बालुयार सालस सोन  
 लोलु सान ल्वलि ललवोनुये ।  
 सनुम्वख वुछिहोस म्वख असुवोनुये ॥  
 लोलु सान ल्वलि ललवोनुये ॥०॥

दूरिरन कोरनम अँन्दरी सूर,  
 मूरि मूरि ललवान लोलुक श्रेह ।  
 मै हय छम लँजमुच अँछनुय जून ॥  
 लोलु सान ल्वलि ललवोनुये ॥०॥

प्रारान प्रारान गोम यँचकाल,  
 हाल म्योन वुछिहे चलिह्यम हैह ।  
 मशिह्यम हु तु बु चोन तय म्योन ॥  
 लोलु सान ल्वलि ललवोनुये ॥०॥

वँन्य् मे दितिमस मंज़ जंगलन,  
 मन छुम चन्य्चल वँछिहस रोय ।  
 अँछ लोसु वाति कर दिलबर म्योन ॥  
 लोलु सान ल्वलि ललवोनुये ॥०॥

प्रछ्य प्रछ्य लूसस हारि तय कावस,  
 दावस लॉजुनस कस वनु हाल।  
 त्राविना लालु म्योन मलालु प्रोन॥  
 लोलु सान ल्वलि ललुवोनुये॥०॥

लोलु सान 'जवहर' जरिह्यस नालस,  
 प्यठ बंगालस पॉरस प्रंग।  
 रचि रचि हाल बावस नौव तय प्रोन॥  
 लोलु सान ल्वलि ललुवोनुये॥०॥



## मंगला दीवी

डखि छम मंगला प्यमुहस पादन,  
 नादन थाव्यम गोश।  
 हलि मुशिकल करि बोज़ि फॅर्ययादन॥  
 नादन थाव्यम गोश॥०॥

नाद म्यॉन्य् विज़ि विज़ि छम बोज़ान,  
 रोज़ान सुत्य् सुत्य् छम मेहरबान।  
 हर दम छम करान पूर मुरादन॥  
 नादन थाव्यम गोश॥०॥

मंगल करि माँज मंगुलॉये,  
 आँयॉय नॅमिथुय पादन तल।  
 चोन सायि छु असि अवलादन॥  
 नादन थाव्यम गोश॥०॥

छिय बॅखुत्य् नॅमिथुय बरतल प्रारान,  
 हारान अँछिवुय खूनि बारान।  
 कर दया दृष्टी पूर करतु वादन॥  
 नादन थाव्यम गोश॥०॥

ममतायि हुंजुय छख टॉठ शक्ती,  
 सखती कास व्वन्य् दिम बॅखती।  
 मदुतस प्रथ विजि सैद्यन तु सादन॥  
 नादन थाव्यम गोश॥०॥

कल्याणकॉरी छख व्वपुकॉरी,  
 सारिनुय छख दिवान अनुग्रह फल।  
 'जवाहर' छु चॉनिस दर्शनस प्रारान॥  
 नादन थाव्यम गोश॥०॥



## साई बाबा

लारान आये पनुने वारे,                      बजि ब्रसवारे दर्शुन हाव ।  
दारस चॉनिस अचान वारि वारे ॥                      बजि ब्रसवारे दर्शुन हाव ॥० ।

साई दर्बार आमृत्य् सॉरी,                      यॉरी करतख जॉरी वोज़ ।  
यस चुय यावर तस कुस मारे ॥                      बजि ब्रसवारे दर्शुन हाव ॥० ।

मायि चानि आमृत्य् निक्क्य बैङ्ग्य लारान,                      प्रारान दस्तुबस्तु चेर मा गोख ।  
अँछताम लोसख दिल गोख तारे ॥                      बजि ब्रसवारे दर्शुन हाव ॥० ।

साई साने छुख बोड जॉनी,                      दॉनी बडि बोड जॉनी कार ।  
बॉनी कारो असि कूत लारे ॥                      बजि ब्रसवारे दर्शुन हाव ॥० ।

जायि जायि व्यापक शिरडि वॉसी,                      अमर्यत खॉसी बाँगरावान ।  
भाग्यवान लॉनि प्रारान अनुवारे ॥                      बजि ब्रसवारे दर्शुन हाव ॥० ।

‘जवहर’ अर्पण चान्य्न् पादन, आयितन थोवमुत च़ेय छुनय पान ।

फुचिमच्चि नावि तस अदुकुस तारे ॥

बजि ब्रसवारे दर्शुन हाव ॥० ॥



## परम दीव

परम दीवी धर्म वति प्यठ,  
थावतम मे शाद हरदम ॥

ठीक पॉठ्य पकुनावतम ।  
द्वख तु दौद्य बॅलुरावतम ॥

दूर प्यठु फॅर्ययाद्य आमुत,  
हावतम बस अख दर्शुन ॥

चूरी प्रारान डेडि तल ।  
डेडि बर मुचुरावतम ॥

बखुशथम येलि ज़िंदगॉनी,  
छुस इन्सॉनियत निशि बेखबर ॥

अदु प्योम इन्सान नाव ।  
इन्सॉन्य् ख्वय हैछिनावतम ॥

ओन तु जोर छुस बुय बेज़ान,  
लोगमुत छुस अनि गॅटिस मंज़ ॥

वतु सारान गॉरज़ान ।  
गाशि चोंगा हावतम ॥

मुफलिसी छुम नाल वोलमुत,  
त्राय छम बस यीरु गछुनुच ॥

छुस ख्यवानुय आह तु वाह्य ।  
कुनि पॉठ्य बचिरावतम ॥

छुस प्योमुत नादार बेकुस,  
आश छम मेय गाश हावुम ॥

चुय अख छुख दादरस ।  
कर्म खुर चॅलुरावतम ॥

शेरि लागय म्वखतु 'जवहर',  
सॅच करु वुन मेचि मोर म्योन ॥

वेरि अॅन्मय व्यनु ग्वलाब ।  
सेज़ि वति पकुनावतम ॥



## माजि मंगलाये जय जयकार

(यि लीला छे म्यानि लीलायि सोम्बरनिय “नमन माल”  
मंज बँहिमिस सफस प्यठ छेपिथ तु बँखत्य्न् हुन्दिस बांद बांद  
करनस प्यठ छुसन यद्य मंज ति शॉमिल करान मँहज तिहुन्जि  
यछायि किन्य् )

सुलि गरि वँथथुय कर नमस्कार,

माजि मंगलाये छु जय जयकार ।

लोलु सान कर नमन बारम्बार ॥

माजि मंगलाये छु जय जयकार ॥०॥

डेडि तल आमुत करान फँरययाद,

मॉजॉय गमु मंजु करि आज़ाद ।

चुय छख मॉजय बायख्तियार ॥

माजि मंगलाये छु जय जयकार ॥०॥

मंगल करअसि मंगलॉयी,

मंगल मंगनि च़ेय कुन आयी ।

पेमुत्य् बेबस यीतनय आर ॥

माजि मंगलाये छु जय जयकार ॥०॥

असि वोत यँचकाल च़ेय प्रारान,

अथुरोट मॉज कर छी परेशान ।

न्यर्बल छि गँमुत्य् गोब असि बार ॥

माजि मंगलाये छु जय जयकार ॥०॥

अँस्य् छी आमृत्य् ननुवॉरी,

पादन तल करान छी ज़ॉरी ।

अर्जी सॉनी कर स्वीकार ॥

माजि मंगलाये छु जय जयकार ॥०॥

भावनायि आँदीन युस युस आव,

हल गॉस मुश्किल असुवुन द्राव ।

दर्शुन मेति हाव कर व्वपकार ॥

माजि मंगलाये छु जय जयकार ॥०॥

ममतायि हुंज छख टॉठ शक्ती,

चानि दर्बारुच गछ्छ्यम भक्ती ।

कासतम मे सखती बोज ज़ारु पार ॥

माजि मंगलाये छु जय जयकार ॥०॥

आँदीन आमृत्य् चानि डेडि तल,

पूजायि लागोय ब्यल तु मादल ।

बेयि जरय 'जवहर' तु म्वखतु जालार ॥

माजि मंगलाये छु जय जयकार ॥०॥



ॐ शान्ति



A Collection of Kashmiri Bhakti Rachinas  
by Jawahar Lal Bhat "Jawahar"



## शॉयिर

नाव	:	जवाहर लाल भट्ट
कलमी नाव	:	'जवहर'
पिताजी	:	स्व० शहीद जिया लाल भट्ट
माताजी	:	स्व० राजरॉनी भट्ट ( दीवकी)
रोज़न बोल	:	शारदाबल क्वपवोर गोन्ड गुशी
असली		
बुन्यक्यनुच	:	127/ई दुर्गानगर, तलाब तिलो जौम
रोज़न जाय		
जा सन्	:	मार्च 1940 ई०
तॉलीम	:	बी० ए० बी एड
पेशि	:	व्वस्ताद ( अध्यापक )

# माता शिवा भगवती



*With Compliments from:*

**Raina Art Printers**

65-B/2, Roop Nagar Enclave, Jammu - 13

Tele. : 0191-2593295, # 9419141499

E-mail : rainaartprinters@yahoo.in











जवाहर लाल भट्ट 'जवहर'